



卞郎中詩集序



三百篇弗待論矣漢魏
而病於陳隋之流飛盛唐
矣而病於晚唐之纖巧黃陳
而病於宋末之麗鄙虞
揚則矣而病於元季之雕琢
乃知善詩者一代不數人

代凡幾變矣

國家文運丕興詩壇多將近
世擅孫吳名者獨江陰卞華
伯焉華伯自進士歷官戶部
郎中居京二十年朝詩有歸
樞持續者輒擁限日應百篇
風揮雨灑故詩名動天下及

讀豫而還山遊水清燕求越
購筆規硯勸而詩益奇以其
自稱蘭堂故江湖之上觀蘭
堂署者詩未誦而心先醉焉
蘭堂詩各體凡五千首其
門生無錫吳以崇謀為繡梓
儒士徐延齡而頌為校正之以

予同年欲得如語予嘗評君
之詩若去庫驪闕干戚森列
左鏘右鳴心懷神慄又如海
藏月華萬寶出浴嬾育靈
犀光綵奪目又如天厨賜食
水陸畢陳三咀再嚼不忍下
咽蓋喻其如也想中也愛而

終得其味也蓋君之詩用事
雖多而不露立意雖新而
有據其追踪老杜而六韜黃
之流也歟今世之專事晚唐
花月之工而無事料者盡於
君詩訂之

賜進士第通奉大夫正治卿

浙江左布政使祁陽寧良書

卷之五
詩集叙

卞郎中詩集叙



卞郎中

詩雜矣乎清水出芙蓉天
然玄雕飾夫容露下洛楊
柳月中疎李之詩本乎李之
天才也橫空盤硬語安帖力
排真韓之詩由乎韓之豪雄
也詩著於心發乎性情即之

事物一皆自然有是人有是詩
不難也詩其易乎三百篇雅
興典則周孔垂訓以成經春
秋之世登高能賦以觀人賢否
兩漢魏晉不衰近禮闈元天
寶特盛而李杜韓柳世稱大
家不讀弟卷書胞無秘笈監則

不能看一已不能况作云乎詩
於是乎其益難矣昔齊輪
扁之者桓公有曰乃之於心應之
於手夫得之心者機之熟應之
手者功之巧其非難而非易焉
不言語得以形容也余同年
江食下君華伯與子博才敏而

在吟詩興之所至持筆伸紙
吟誦應物官思多滯泉身
每層出頃刻多至數十韻表
象不休清遠亦厚為不經之
至可刻之之作則嚴整精
切令人悚敬而又澹然不見
有繫之使人所以為難而事

伯易之蓋其機杼于胸中
者若以思物以為之役也豈
易窺其涯哉每錫好子吳
尚朴嘗遺其子鏈說吳游鏈
手編為多干卷鏤梓以傳
君與余曰盜一多辭不獲也
以及

成化十二年丙申冬十一月望
南京大理寺卿致仕葉守
老人仁和及時心素于城隍
孫王儼之所

市郎中詩集卷之一

七言古風歌行附

松石

蒼松亭亭白石齒齒白石曾為黃石公蒼松元是赤松
子松不摧石不爛雲之根鶴之伴有美人兮樂考槃撫
松坐石六月寒徃徃白雲生澗底時時玄鶴下雲端于
以采兔絲于以斲茯苓丹厓翠壁斷空青一食石髓三
千齡松乎石乎吾語汝汝今且莫作棟梁亦莫化作金
華羊待我山中來射虎滿身風露松花香

牧牛圖

門生錫山吳緹編刊

清時考牧歌周詩南山白石徒爾為歸來枕却蓑衣卧
牛不齧鯁亦不飢明日從容向南畝怕逐征車苦奔走
年年租賦足公家社鼓如雷飲社酒我亦曾看黑牡丹
一犁雨後東風寒考堂南畔披圖處杏花邨裏思漫漫
春遊圖

東風花開未花謝溪山處處春如畫野人不遭官長罵
蹇驢豈必東家借行行踏破苔花碧詩懷自寬天地窄
旁人相見莫相猜不是華陰縣裏客

許由棄瓢

天下何重瓢何輕又恠風吹歷歷聲棄之水中不復顧
瓢與天下俱無情而夫戀祿苦難舍焉知軒冕倘來者

兩足奔波塵海間何曾夢到箕山下

漁樂圖

漁家樂樂何如占斷烟波萬頃餘扁舟穩載如廣居不
釣璜只釣魚得魚即沽酒此外無所須終身妻子恒相
娛笑他釣名與釣利百憂千慮何其愚

時齋

老夫甘作襜褕子觸熱來造時齋裏時齋主者通古今
凡百隨時而已矣天道時寒時暑地道流行坎止時乎
時乎天地且不違吾人豈敢違天地有時默坐虛白室
有時行覽青山色有時抱膝梁甫吟有時夢鶴遊赤壁
花晨月夕不樂將如何時乎一去兮忽若東逝波遲遲

乎接浙三宿而出畫我師古人丘與軻為君試作時齋
歌

挹翠樓

挹翠樓在何許若霄二水交流處乾坤清氣結成翠俗
物與之不相遇獨有樓中人以手挹而取取之左右逢
其原放之則散卷則聚若兮霄兮一碧涵青天併作寒
泉掬入膽瓶裏弁山橫枕太湖之南如畫障雲月硯屏
能蓄此翠光晴是水精宮翠色空浸鷗青紙一塵不落
水壺中萬境都來淨如洗闌風千里安在哉元龍百尺
而已矣我欲時來卧此樓醉壓濕雲飛不起

漁樂

一生踏浪不踏土足跡何曾到官府大罾小網作生涯
日得魚蝦漫無數少小為漁今已翁日快活年年豐
釣鰲手段吾不試誰知尚父之非熊蘋末西風來浙浙
江南吹笛聞江北醉來不覺雙眼白仰看青天大如席
農耕商販足催科漁家之樂樂如何操舟穩若在平地
平地風波世上多

澹然

澹然子澹澹一心清似水濃如醴者吾所耻不慕膏粱
與紈綺巡簷索笑有梅花何必春園宴桃李茅茨蕭蕭
六月寒花中君子常相看秋風三迳有松菊松可撫兮
菊可食君不見他家甲第連雲起車馬填門耀朱紫一

朝運去成落窳門外雀羅而已矣何如澹然無所營坐
令寥廓清風生恬澹無為歌太平身乘六氣三千齡

駉馬行春

金烏拂羽扶桑曉乘駉迤遲淮南道四蹄寒挾霜蕭蕭
五花雲暎日杲杲千金燕市未足多疋練長門空自好
豈徒山嶽能動搖直使豺狼淨如掃叱起白石是神羊
種來莫羨皆堯草金牛岡下有畊農白馬湖邊無餓草
澄清天下收大功踏踏亨衢歸去早

宗叔願心翁休休亭

我本勞勞亭上客來向休休亭上游主人呼取百壺酒
酒酣為我歌休休世間萬事都不挂心頭征帆昨日度

東海歸來繫纜蘆花洲一漁翁對雙白鷗別燕秣越馳
躡騶于今伏櫪不響亦不鞅貴為萬戶侯草頭露落誰
能留富有千金埒脂膏化作然臍油狐白何如百結裘
瓦盆羞勝黃金甌山肴野蔌當珍羞安樂之外復何求
東封函谷非我謀南尋禹穴將焉求飛天八重刺八州
我獨一壑兮一丘緬懷箕山巢與由此輩與我真同流
震驚百里不落耳巖巖萬仞不入眸仰無愧兮俯無怍
既無喜兮亦無憂藐乎江漢之漂萍兮天地之蜉蝣浮
兮休兮千秋萬古同悠悠彼勞勞者肯來從我休休不
試問休休與勞勞二者孰劣而孰優

松石圖

君家庭中石媧皇補天餘五色至今猶帶紫霄烟拂拂
霏霏淡無跡石旁一松樹種來恨不高千尺子規未得
來上啼海鶴尋巢下空碧鶴兮千歲松萬年石也與天
相後先主人食松啖石髓平地可作蓬壺仙涼風飄飄
金粉落山中酒熟獨自酌醉眠石上毛髮寒松聲如奏
釣天樂不射將軍虎不叱道士羊巢雲亦學李太白騎
鶴東去扳扶桑十八公我無夢石穴便是華陽洞球琳
琅玕皆入貢惟此雲根移不動

畫竹

金壺倒潑一斗墨綵毫染出瀟湘色六月高堂爽氣生
蒼雪洒衣冷無跡嗟哉丹山有飢鳳何時啄此琅玕實

欲截嶰谷製六律坐使陽春回萬國又欲東海釣六鰲
長竿下拂珊瑚石歸來再鼓南游舵酒酣卧吹月下笛
鄒佑之十丈蓮

十丈蓮在何許泰華峰頭玉井底翩然一葉隨梁溪載
我玉人弄烟水玉人前身是太乙手把青藜光滿室錦
雲鄉裏坐看書晴虹照夜如白日喚取佳人來雪藕蜜
脾香沁碧筒酒醉唱南朝相府蓮翠盤涼露真珠走龍
驤萬斛於我何有哉不帆不楫自往回人間淤泥水脫
去直欲度海登蓬萊菱花影動南風急芙蓉水濺荷衣
濕空明不入小洞房仰看青天如筠笠

善卷寺涵碧軒

龍巖古寺如龍門峯律橫枕西南坤龍向人間行雨去
水深千尺清潭存上人結屋潭之側潭光倒浸一天碧
禪心包涵天與潭天淨潭空兩無跡潭花的的水底紅
恰如燈影落鏡中上人隱几寂無語色相本來都是空
龍巖老宿依然在知我袖中有東海更湏涵碧濤一源
散作千流與萬派

莫善慶南溪草堂

鴻溪南浸龍山足有美人兮此卜築九朵芙蓉翠欲滴
一泓流水清如玉草堂亦有浣花春誰問東吳與西蜀
看花賦詩飲春酒不減葡萄三百斛餘酣晚漱南溪水
毛髮生寒肌起粟清秋夜半霜月高一榻仍借南溪宿

明發主人更苦留堂下黃金花簇簇一舉累十別筵飲
插花湍頭香湍屋新詩寫入五雲箋光照牙籤三萬軸

得山樓

他人只結山中屋不見衆山真面目斯人獨起山中樓
衆山都在書案頭有山不見山如失無山不見山乃得
吾山之雲出無心吾山之水流不息天開圖畫列左右
九朵芙蓉落吾手山花飛飛能送酒山鳥嚶嚶自求友
或如游龍或舞鳳白石秦鞭鞭不動得山樓上攬秀色
不碍胸中九雲夢

題吳處明雪竹

古云無竹令人俗今者有竹美如玉玉鸞銀鳳相向舞

此君歲晚邀滕六幽人一生抱高節皎皎白駒在空谷
搖風環珮鏘然鳴擲地琅玕淨如沐四座無塵斗室虛
徹夜寒光照讀書老天既降豐年瑞平安消息復何如
梁園授簡未足數郢曲歌罷樂有餘山陰小舟不必上
呼取龍杖行徐徐

鴈

雙翎高逐秋風起天北天南千萬里晚來棲泊楚江頭
雪白蘆花照秋水上林帛書今已無北門納款有匈奴
天空野濶少繒繳只啣菰米不啣蘆夜寒飛夢落何許
多在烟汀與月渚身辭靈沼年復年那得更尋鷓鴣侶
月波書屋

君家有屋如林屋萬間徒多數間足浴沂童子六七人
挿架牙籤三萬軸夜深明月生海東一塵不翳白晝同
吾伊書聲振丹靛晶熒劍光橫白虹有漪瀾兮繞屋下
湛然一道銀河瀉豈無六六黃金鱗泥蟠只待春雷化
瑩然冰壺映寒雪吾心與之俱皎潔青天倒浸碧琉璃
吾心與之共澄徹翠芸香拂書帶草脉望飛空一髮小
容光必照萬境空逝者如斯體吾道

張介菴

舉世一於和惟君和而介介或無所容未免伯夷隘和
而不流介而通與今人異古人同介也三公不可易陋
哉千駟與萬鍾我來張渚十日住四座春風吹玉樹擷

疏小酌擊缶吟指點雲松結巢處一揮金錯囊垂罄義
薄雲天郭元振荆南白屋卧雪人雪深三尺誰存問介
菴之介介于石不顧萬金雙白璧洋洋之水可樂飢坐
對青山太古色

綠珠圖

齊奴不學守錢虜三斛真珠賤如土娉婷飛下彩雲端
一朵芙蓉映秋浦香塵小步金蓮穩直得千金買一哂
髻雲斜軀金鳳釵眉月輕勻綠螺粉金谷春光暖如酒
聞將玉管調纖手新詞舊曲恁堪憐落盡梅花折楊柳
孫郎錯料梁家女目斷畫樓高幾許飄然正似落梅花
楊柳含顰泣春雨

春牧圖

東風暖霧散林麓海上晴光眩遙目牧人盡說夢維魚
兩兩三三成一簇烏犍白牝紛相逐搏虎力強無敵敵
縣官子民蓄蕃息不但添丁又添犢半溪新漲花流紅
十里平原草鋪綠橫風竹笛無別腔盡是田家太平曲
蓑衣覆地更堪卧何必文茵紫羅褥牛兮犢兮爾將服
村北村南啼布穀今年貢賦料無逋到處一犁春雨足
遊盛時正富村別墅

九龍直北十餘里五畝之園茅屋廛盛家別墅於此開
風光占斷東南美清溪繞屋花連天白鶴鳴皋月照水
喬木千章藹若雲秫田十頃平如几玉屋山人今已矣

王維輞川何足擬主人邀我三度遊一度便作十日留
布谷雨晴楊柳曉鯉魚風起芙蓉秋共和陽春與白雪
誰憐楚舞并吳謳慕天席地大家醉一笑蕩盡萬古愁
北里薰天多富兒長金積玉無休時齊奴金谷果何在
夕易芳草空離離君家常棣天下士先憂後樂同心期
倒衣命駕曾數數慣看蜻蜓立釣絲

卞式之烏來堂

昔聞烏集府今見烏來堂四時于此丞且嘗祖壠堂之
後神位堂中央堂成烏乃集惟孝斯致祥東家豈無數
仞之棟題烏乎於此不足栖西家豈無百尺之高樓烏
乎於此不肯留人不留烏烏自止丘隅黃鳥亦如此卞

氏六龍有孝子烏之來也豈偶爾君不見顏烏墳上烏
銜土烏傷之名傳萬古

趙廣洋海航

前年渡河將一葦河上招招者舟子今年渡海豈渡河
要泝弱流三萬里誰言海水杯來大散作千支與萬派
不必真人十丈蓮片帆如葉舟如芥颶風不作波不揚
瑩然一鏡涵天光鮫室流珠舟側畔蜃樓散彩天中央
海上三山色不改扶桑一樹千年在請君轉舵歸去來
袖中亦自有東海

節婦為朱將軍賦

君不見南山松霜鬢雪虐不改色世上幾度春花紅又

不見北堂竹歲去年來只自青人間烈火多焚王將軍
之母抱苦節一片冰心冷如鏡良人遇害正青年再不
移天向天說將軍乃是遺腹者呱呱夜泣寒燈下辟纊
織布仍乳孤五十餘年甘守寡將軍入直麒麟殿退朝
奉母設華饌曾申大義復父讐白日當天九泉見母兮
節兮良在茲茹苦若甘天所知天教有子更有壽松竹
相映蟠桃枝蟠桃結子千年後松竹因之亦不朽觀風
使者采吾詩留取清光照宇宙

六龍圖

風雲際會良不難神物豈得終泥蟠桃花吹紅春水暖
霹靂裂石鬼膽寒一龍隱見雲之端一龍迴旋在急湍

四龍相狎列左右進退從容有先後延平寶劍已矣乎
葛陂竹杖今在否何如六龍駕五雲直與天地同悠久

何竹鶴山水

袁州太守何其賢鳥中之鳳人中仙眼空四海胸雲夢
懸車早賦歸來篇鋤雲自種竹三延養鶴只買二頃田
明窓淨几拂縑素興至落筆生雲烟雜花幽草各綰麗
蒼藤古木相鉤連雲門若耶在織末只尺弱水蓬壺天
蓬壺可望不可即聊上米家書畫船其間亦有好事者
卧龍人去一榻懸吾鄉風流徐孺子太守下榻三年前
青絲玉壺送春酒碧桃花庭開瓊筵醉傾墨汁如流泉
幻出斜川及輞川分明孺子卜築處牽蘿補茅三四椽

左圖右史看不厭光風霽月浩無邊
逍遙在叟室虛白澹泊楊雄草太玄
寒子買鄰乏百萬所蓄舊物惟青氈
肩輿數許造竹所江空歲宴相周旋

愛菊

陶潛采菊賦歸去靈均食菊嗟不遇
殷君愛菊豈屈陶昇平世世金陵住
笑移九畹置坐旁家有三逕何曾荒
綵筆題詩照晚節玉壺載酒涵秋香
頽齡可制飢可樂何必三山覓大藥
東園桃李發狂花顛風一夜成蕭索

題龍

一龍居中巨而尊只尺可上天之門
兩龍旁向勢若奔濤翻石走陽烏昏
一龍歛掉連雲尾回頭似與明珠戲

兩龍浮游各延頸會合誰知靈物意
吾聞天子朝元駕六龍左右前後彼此無
乃同龍兮龍兮亮天工雷雨下土年年豐

芭蕉美人圖為吳暑正世隆題

楚天玄雲墨作堆飛向美人頭上
來翠翹金鳳挿雲際明月高懸玉鏡臺
春衣膩帖淡粧態蛾綠微勻遠山黛
猩紅空染石榴裙美人心殊不愛所愛
平生只貞素襪塵懶逐金蓮步盈盈一水
未成橋皎皎三星虛在戶小倚玲瓏山骨
寒高樓閒却玉闌干幽懷暗與湘靈會
巫山十二天漫漫欲將白苧題扇羅不是尋常踏踏歌
秋風若到芭蕉葉此病此時將奈何

寄寧波太守張宗器

太守胸中吞四明呼吸氣通白玉京太守眼底藐東海
海上蟠桃一蓓蕾桃花桃實三千年太守學道不學仙
學道由來學類孟君民堯舜非徒然自携謝朓驚人句
登山問天天不語五馬前驅振烈風山陰恠物泣如雨
向來傲兀水曹郎一臺二妙誰能當今守東南昔西北
兩郡何幸逢龔黃前年尹幕寄書去訴我平生不平事
今者問訊托尹來如得清風掃炎氣君才只合領三組
跌宕賢豪一千古蜿蜒彪炳不可測人中之龍詩中虎
卞和三獻荆山玉畢竟其如尖雙足宋畊漫爾守株兔
鄭夢終焉失蕉鹿欲趁西風十幅蒲四明之下遊西湖

憑君送我百斛酒醉呼狂客高門徒聞說象山亦可梯
梯雲采采紅木犀釣竿拂着六鷺背海梁高跨雙虹霓
天雞三唱人間曉扶桑枝頭日杲杲我自江湖君廟堂
霖雨還須潤枯稿

送友出使

崑崙發源浩百川一道上與天河連獨乘星槎萬里去
餘子碌碌誰夤緣黃門自是人中仙高秋銜
命下九天手持天上瑤華篇乘槎如坐萬斛船清風來
從弱水外紅日飛上扶桑顛海隅之島一小國仰荷
天恩祝萬年使旋玉節凌空烟授我天孫之雲錦填我
胸中之闕然假令拾得支機石君平知道在誰邊

送施郎中紳使山海

八座古今重奕葉當青雲劍氣斗間見履聲天上聞十年出入司徒署寸步何曾失規矩寧論有脚是陽春未許商岩占霖雨果然昨夜勅旨嚴山海迤邐勞行驂萬廩邊儲軍飽足一方節制掌握兼黃沙捲地朔風號豈曰後事吾賢勞皇華杖杜歌有日孔雀銜雲上繡袍

賀劉方伯崇善得子

蟠桃結實三千年枯楊生稊或偶然爭似身居大方岳五十得子在眼前始言一子萬事足今喜雙雛美如玉殘冬雨雪正飛飛別有春風生解谷俸錢都買犀錢散上客簪花後堂宴一經何必滿籛金好書預辦三千卷

今之劉公古徐卿積善公侯衮衮生縱橫綵筆作歌賀誰是前身杜少陵

傳畊為朱文立作

方寸中有萬頃地畊也可傳千百世傳畊端的是傳心心地未可岐而二乃祖乃父以此傳子孫不畊亦徒然若能克播又克穫我庾維億多豐年仁為五穀種之美義除稂莠無荒穢穰穰百祿自天來時時相困周貧匱東家傳得黃金埒西家傳得白玉屑一朝運去金玉散浮雲捲盡空花滅不如傳畊無盡期旱乾水溢終不懼予生亦有傳畊志穀日東風為賦詩

耕雲

朝出雲相迎暮歸雲相送雲冷草根枯雲和土脉動生
計年年事一犁耕遍壠東復壠西雲深恐爾耕得淺布
穀飛上雲林啼我愛耕雲客為作耕雲辭我笑呼龍起
墨池相從耕雲種紫芝

冰蘖

冰寒寒徹骨蘖苦難為舌二者能甘之一生見清節世
人紛紛不耐寒趨炎炙手無厚顏貪婪美味不知足毒
疾乃生心腹間何如冰蘖翁神爽氣自充富貴有時盡
清名垂不窮

劉貞外廷震所藏夏太常竹

我家不在湘江住我客曾向湘江遊珮環驚回翠華夢

鷓鴣喚起黃陵愁千竿萬竿直挺挺五月六月寒颼颼
別來每動湘江吟相思一日如三秋湘江之吟吟不絕
更有竹枝歌慘切空谷佳人瘦如削黃州謫官心似鍊
月中孤鸞怨離別蓬廬殘燈半明滅憑誰招得小遊仙
投贈琅玕青玉玦我今何以懷抱開青天白日無陰霾
長身君子列左右丈人兀立長相陪恍然悟却丹青手
容臺老卿世希有伶倫一朝作律後龍種千年根不朽
從今懶鼓湘江舵雲夢胸中吞八九歲寒貞素永相守
何必黃金印如斗

壽鄭質菴其子循初學錄

三月之望又一日長庚光射瑤天碧而翁行幕東華東

元是鄭公鄉裏客郎君年少才無敵駙馬都尉之西席
殷勤迎養到京邸弄雖戲絲翁之側翁年于今近七
十顏如渥丹雙鬢黑登堂何以為翁壽崑崙高積蟠桃
核既有三千年之玉枝亦有五百年之銅狄郎君官貴
身復閒何必黃金兼白璧桃花飛入流霞紅鶴南飛曲
聞吹笛笛聲穿雲且裂石何獨東坡遊赤壁翁能作詩
又作賦玉振金聲隨地擲陽春一曲郢人歌玉塵九斛
巴園奕蟲沙碌碌焉足數神仙中人不易得我今為獻
南山篇招邀赤松與黃石明朝報我以何物九節菖蒲
雙玉鼎

贈談員外憲章

去年訪君白雲司北城官舍宴我時火龍橫飛煽毒熱
贈我八尺黃琉璃今年訪君無錫城未秋已覺涼風生
尚書氣與秋天杳副郎懷抱冰壺清若翁方拜小秋
勅蒼顏白髮生春色月中丹桂能幾枝半是君家弟兄
得小秋自儼商山老手種琅玕拾瑤草副郎一歲將九
遷五雲飛下金花誥再三勸我金陵遊太白千古空
悠悠江波為我釀春酒醉裡踏翻白鷺洲

奕碁圖

巴園木奴一子樹而有二叟其中住奈無深根固蒂何
化作白龍上天去不如洞庭人家好水閣無塵淨如掃
楸枰相對白日閒一代風流屬二老蔗漿茗飲隨所有

手談不數談天口丁丁子聲出戶來鶴夢堦前安穩否
勝固欣然敗亦喜但求適意而已矣王郎爭道何足云
羊曇賭墅亦堪耻優哉游哉聊卒歲破賊休誇小兒輩
涼風蕭蕭水面來爐烟吹斷黃雲穗

過廷章寫松

天地爐陰陽炭烈日烜剛風煽鑄出屈鍊真百鍊凍雲
壓山山欲頽鍊色蒼蒼終不變前身應是宋廣平天與
鍊心并鍊面月斧雲斤且休斫六甲六丁空自健等閒
化作老鍊龍三百萬衆莫與戰此鍊鑄作上方劍秋水
芙蓉吐清皎斬罷樓闌斬佞臣魑魅魍魎莫敢犯

登瀛圖

吾聞唐十八學士有房玄齡杜如晦風雲際會在一朝
飛步瀛洲若平地瀛洲春風吹五雲仙樂時時天上聞
黃封酒注白獸樽葡萄潑綠生波紋樂哉醉酒復飽德
論思宜盡儒臣職其中何以有奸邪涇渭混淆初未識
二十二入舜之相欽哉天工惟時亮丹青妙手能絕倫
何不先圖舜臣像

夏廷用桂仙圖

憶昔夢上天飛步青雲路九闕誰守之蕩蕩不我阻踏
翻金蟾走玉兔親見霓裳羽衣舞一毫不虧大寶鏡功
成八萬二千戶嫦娥初竊后羿藥桂樹斫斫吳剛斧斧
聲丁丁朝復暮樹剗隨破亦隨補種樹問何人非今又

非古先天而生後天老交枝接葉紛無數中秋歲歲復
年年花落花開知幾度嫦娥愛花手自折霧縠烟綃濕
風露嫣然贈我第一枝頃爾傾心若平素插花歸來拜
當宁錫宴瑤林寂深處十年不續上天夢玉宇瑤樓每
延佇中間消息兩茫然自料此生難再遇偶遇若家圖
畫裡人面花枝宛如故渴心一洗不生塵玉液玄津生
肺腑知君來歲上天去金粟香中應少住君年獨少才
獨富信手折花莫敢妬此花占斷狀元紅而白與黃何
足數月明待漏丹鳳門天香飛下清虛府

送梅戶侯

憶君送我春明門春明門外三月春落花飛作雨紛

春泥深沒雙車輪斗酒且酌城之闈憶君贈我玉如意
人生聚散真夢耳願得如意長如此百歲光陰一彈指
憶君贈我珊瑚鈎文光萬丈冲斗牛珊瑚出自東海頭
捲我珠簾十二樓十二樓中白日靜心旌搖搖風不定
風兮吹我只素書飛到君家問起居只知君在京華住
焉知君向滇南去滇南萬里若咫尺老眼摩娑古銅柱
飛騎南來三百驛尋盟少駐周郎宅維時相見如夢中
置酒高堂話夙昔青童兩兩吹玉笛翠蛾娟娟彈錦瑟
曲中不奏長相思夢天謠與遊仙詞君昔年少從鍊師
誤讀黃庭天謫之宦海茫茫將奈何湯湯浩浩皆恩波
飛步雲臺與麟閣丈夫勲業無蹉跎老我衰遲多伏枕

景陽苦索囊中錦獨留一片清水出萬壑坐遣六月炎
炎成凜凜明朝又踏金陵道江上青山一螺小舉頭北
望五雲深封章入奏 龍樓曉

九龍圖

巨靈一劈九龍山九龍飛去不復還僧繇自是豢龍手
形體置之圖畫間向來捲海入天漢從此海波不得滿
噓氣成雲上 九重世間浪說九仙館古者人龍苟與
下文如彪炳目如電九龍合八又合六上天下地飛騰
遍

畫竹

珊瑚枝高十尺照乘珠連城璧何如君家千琅玕四時

不改青青色珠沉璧碎將奈何擊斷珊瑚徒自惜千紅
萬紫如蜀錦疾風一掃皆狼籍琅玕心既虛琅玕節又
直葉葉晝遮炎日赤枝枝夜篩涼月白葛陂一龍露頭
角丹山雙鳳振羽翻東海任公罷釣疑君子堂中宴佳
客誰把并州快剪刀截破瀟湘半江碧

翠蓬為金太守題

郡中新起小亭子覆以仙茅庇風雨根無寸土終不死
葉葉叢叢翠如洗太守名亭曰翠蓬草名得與亭名同
此名一日播千古惟天盡在春風中嗟乎物各有時遇
無忘角弓殖嘉樹翠蓬翠蓬紀郡志召伯甘棠同蔽芾

五星士梅菴

兩目閃閃電光紫一心炯炯照秋水東都門外信馬蹄
何及景純識龍耳空山亦有金盞地踏破寒雲一指示
釣臺曾結梅花菴羲畫先天在曾次北枝寄與壠頭人
南枝散作江南春春風一路吹行李路人爭送青烏子
題卓太守所蓄張廷端畫

夜堂夢度西崆峒玉泉倒瀉如白虹南海北海不可辯
便覺八面來蓬蓬須臾看石仇池曲九峯玲瓏翠一簇
瀟湘洞庭只尺間日出烟銷淨寒葉夢回十日成坐馳
此景恍惚不可追朝來卓侯展畫卷竹石風泉兼有之
掀髯對畫發長嘯乃知昨夢為先兆夢乎非假亦非真
但愛此畫入神妙我侯君子之德風才思萬斛湧泉同

落落出群介于石挺挺不屈貞如松張君袖有春秋筆
大書特書書不一贈之以畫不以書畫亦傳心即心畫
石中之印忠孝侯琅玕雜佩珊瑚鈞世澤浩浩閩江流
清風洒洒三千秋

送趙郎中鳴盛

天王軫念念吾農吾農年來罹厥凶捧 詔纔下蓬萊
宮先聲已滿東吳東云是司徒正郎趙姓者前有清獻
後有公十萬兵五十卷與天二十八宿一一羅心曾鳳
凰鳴兮喧啾百鳥寂無語騏驎出兮頓令冥北之羣空
大江之南四郡中察民疾苦觀民風皎皎一鏡懸秋空
下照逃亡屋纖翳不可容千里春回少卿筆一道霜飛

御史駢肅將天命代天工卹天民兮減租庸封章行矣
奏九重上以補袞闕下以甦疲瘵台階不日可立致
大旱霖雨收成功嗟余潦倒雙髮蓬大夫之後不可從
世人往往狎謫龍九仙館裡聊潛踪江湖雷雨自來往
獨抱驪珠睡正濃知我者誰失馬翁丈夫事未定君子
道豈窮勿為出處心忡忡揮五絃兮送歸鴻鼓腹而歌
兮歌年豐江湖與魏關跡異心則同嗚呼人生安得如
公今日之遭逢

醉歌行為鄒佑之作

買舟南遊秦伯鄉望見喬木之蒼蒼乃是忠公雲孫之
舊第主人一咲迎我登其堂堂中有書三萬卷寶劍在

匣琴在囊讀書鼓琴聲琅琅斗牛之間射龍光看劍既
罷掃地焚香一言一語何慨慷摩斥奸佞崇忠良下涉
晉宋上窺虞唐俯仰今古皆茫茫既而同上東臬之別
墅秋陽皜皜秋風涼墅南墅北一縱目千畦萬頃如雲
黃輞川辛夷塢杜陵百花庄兄弟樂且湛賔從趨而踰
文采風流不可當歌以青玉案舞以白霓裳酌以黃金
觴啖以紫瑤霜一觴一歌復一舞不知孰賔孰主爾汝
忘亦不知誰為太白之謫四明之狂二豪若螺贏泰山
真毫芒芙蓉湖上雙鴛鴦鯉魚吹風搖釣航濯纓往往
同滄浪重来約我明年二三月風吹野水一洗梨花粧
隆平侯梅花

冰花不浣京洛塵玉藥中涵萬古春問渠何事骨太瘦
要比飯顆山前人花光風流冷如鍊 今代隆平擅清
絕花下題詩花亦寒吐出曾中萬壑雪

松月為施克莊賦

有恠物兮虬其鬚的皦領下明月珠珠光下燭九幽破
萬斛心塵一掃無此鬚不受執政拂此身不封秦大夫
有恠魁兮髯若戟時向空山倚寒碧簸弄明月坐磐石
為汝作贊表孤直

徐惟初席上次韻

寶薰百和藝螺甲天風吹簾海牛壓引年即是老神仙
不用藍田食玉法濟濟仙姝集瑤館當筵爭勸金杯滿

庭露宵零五桂凍檻烟畫拂三花暖誰其主者曰徐卿
謂我舊有能詩名醉中尋常作長句雪色壁上墨汁傾

張少大聽月

月如一團冰流空夜澄澄倒映山河影豈有桂樹生浪
傳吳剛斧斫桂聲丁丁世人誰遊廣寒府那見霓裳羽
衣舞并沉圓缺乃常度陰精胡為歲玉兔誰曾搗藥將
玉杵豈有望舒作月御羿妻孰從月裡去斯人聽月君
知否只聽於無不聽有聽有泥其跡聽無無莫測無極
而太極太極本無極其唯聽月者能識我欲從之讀周
易月白夜庭涼露滴

贈蕭舉人漢文

而翁當代文章伯大篇勸我南山石我嗟生晚不相
識幾度臨文三歎息君家舊譜承八蕭祥慶有角鳳有
毛大都才子多如雨榜花獨數人中豪于時我願瞻丰
采官路無由一傾蓋我且南還君北往春燕秋鴻不相
待各天萬里明月同何況密邇東吳東昨朝下馬胡塘
上君亦柳陰繫短篷引鶴叩門尋將詡詡也於君舊賓
主咲談四座清風生過雨殘蟬淨秋暑綠荷作筍白玉
醪歌聲晚過行雲高君才倜儻意慷慨眼底碌碌皆兒
曹行見天街飛步濶等閒出入黃金闥贈君一言居勿
忘丈夫落落存大節

邵允南天香雅調

碧玉枝黃金粟散作天香三萬斛秋高氣爽淨無塵
落神仙艷華屋試將銀甲弄秦箏鴛鴦絃上相思曲一
絃一柱緩復促聲拂黃金搖碧玉不化白龍飛上天
絃自有鸞膠續

梅花為吳以榮賦

花魁壓倒天下白花神水肌玉骨酪洛陽不識羅浮仙
酷愛鼠姑好顏色羅浮夢斷今十年偶然一見空江邊
天寒再索不成咲但有鍊石心彌堅豈徒漏洩春消息
金鼎調羹待佳實殷勤傳語傳巖人莫負君王夢良弼

贈鄭徵君

子真谷口清風在海桑一變三千載有斐君子其雲孫

玉樹丰標甚瀟洒有足不踏東華軟紅土有手不搏南山白額虎畫船日日載春風月明醉卧水精府舉世誰能半日間一生無事任盤桓達人觀有如此者何必區區欲留富貴待所懽

王玉振春林圖

我嘗讀書秋樹根不似春林讀書好春風吹入伸舒惟青山綠遍康成草書聲出林曙色開時有扁舟問字來莫道山深天漢遠夜夜虹光燭上台先生白髮春俱暮掃地焚香日幾度相尋願借異書看只恐高眠不關戶

宋丞相障綠堂詩卷後

高堂六月展詩卷天際颯颯清風來誦之未了髮已竦

白日射地陰霾開忠臣烈士生氣不可摩一時其奈奸雄何剛腸不回吐厲語砥柱獨當千丈波障綠堂之右與左蒼官青史紛無數應有鬼神為呵護便須鍊筆鏤貞珉一字一句傳千古恐有六丁雷電下取將金匱石室未必終能藏

蘭亭卷

世有黃金高北斗青李來禽幾家有蘭亭直本始見之神出鬼沒龍蛇走曲水流觴安在哉茂林脩竹荒蒼苔惟留筆法宛如昨石鼓不落秦坑灰後來作者頗相逼我欲從之不可得井闌蕭蕭井水清柿葉滿庭秋月白

贈張都運文吉

偉哉天上張公子京兆風流未足儼亨衢發軔自賢科
拾芥易如取青紫涇水一石數斗泥投以寸膠則清之
海醜百萬供國賦奸吏不敢偷毫釐烏紗帽上青天在
荔枝壓重黃金帶西湖百頃共襟度南嶺孤松同節槩
憶昔並座尚書臺司徒清鑒君多才君今三品若固有
老我拂衣歸去來一年兩度見君面花枝滿堂動高宴
不誇金印正纍纍亦似緋袍能戀戀諸郎森然玉樹高
不獨超宗有鳳毛鯉庭五色斑衣舞他日春雲宮錦袍
書余都憲士英往歲餞行詩卷後

少年大藩作方伯曾中文章蟠五色自有甲兵數百萬
金板六弢乃陳迹周家文武尹吉甫誰謂今人不如古

紫薇垣裏問蒼生白鴈塞邊驛顯虜壯乎西北之長城
奉 詔又向東南行東南兩浙較西夏彼此未可分重
輕 詔令馳驛汝往哉父老遶道徒徘徊南山如戲青
玉案瀾水爭濺黃金杯穆如有頃清風起詞源出自天
潢裡先憂後樂本同心借寇留蕭豈事美春光浩蕩蘓
公堤觀潮秋閣江之湄一方按堵奏成績北門鎖鑰將
邊誰

四逕為括蒼致仕 戶侯賦

蔣家三逕少楊家九逕多君家關四逕其所植者何一
逕柳春色薰人濃似酒一逕槐夏陰如幄無炎埃一逕
黃金花爛熳直把秋色都買斷一逕篔簹落蒼雪清詩

題徧琅玕節何心問九烈無夢作三公
養英豈教大夫獨抱節直與君子同
四時之樂樂無已將家楊家未必能
勝此乃知括蒼諸將中而獨斯人
隱君子

送蔡貳守時中之京

五色雲中騎綵鳳天雞驚破朝天夢
起來為作朝天歌春風吹開硯池凍
別駕一行向永嘉倏忽六載辭京華
每憐孤嶼亭前月曾照宜春苑裡花
雖然考績惟三載公事誰容及
公代舉頭日下是長安江漢朝宗入
于海膏我車兮秣我馬理我舟楫過
吳下計程十日上揚州直抵金臺始
稅駕東方曠曠雙關曉萬年枝上春
光好赤墀咫尺觀

天顏天語從容為爾勞奏功若較東
諸侯黃堂上佐爾獨優安得有此百
別駕布列一洗蒼生憂前年御史爾
旌異驥足焉能以淹此此行峻權其
誰歸請以赤心報天子雙親將膺五
花誥洞庭歸寧當便道湖水息波
同浩浩我登爾之具慶堂歌我朝天
歌酌彼崑崙觴祝天子兮億萬年雙
親之樂樂無央

金梅為吳處明題

誰將金汁和雪汁寫出寒花金氣濕
金屋雖然貯阿嬌若比比花應不及
阿嬌未必心如鍊此花冰清又玉潔
只合高登群玉峯豈宜誤落千金埒
驪黃牝牡不足論惟良能空冀北群
如金如玉色相爾百花之魁天下聞

畫為徐延齡題

丹砂牀暖芙蓉繁蒼松骨推白石爛十年書劍山中居
夜夜虹光燭霄漢終南捷徑將無同古來豈必一卧龍
天手神聖百辟從吾徒立壑聊從容冥心太古游冲漠
巢許清風動家廓溪上蘭舟載酒來一醉高歌良不惡

畫竹為過允明作

英皇泣天天不語翠翹滴濕湘江雨重華一去不復回
愁結秋雲黯秋渚鈎輈無聲鳳凰老蕭颯西風何太早
多情獨有文洋州霜毫漬墨和烟掃

彭玄中山水為華楚蓄賦

吾鄉道士名玄中八百歲者其同宗傲睨乾坤雙白眼

嗟氣變作五彩虹游戲三昧發天趣趣在不求工自工
投之金鑿若玉塊一笑相舍即相從從之倒瀉金盞汁
安排非緩亦非急化機斡旋橐籥動元氣淋漓烟霧濕
二豪叱退股且慄兩兩玉童拱而立自言醉旭號草聖
投我未可分等級解衣磐礴意開閉閉門五日十日間
胸吞雲夢在八九手縮巫山十二鬟錦城花開若繡嶺
赤岸水滿如銀灣木杯泛海神僧度鍊鎖懸厓仙客攀
方今車書混一家浪跡何必窮天涯千里萬里靜散地
掃除魑魅驅龍蛇太行恒山至碣石合黎餘波入流沙
坤輿三百六十軸形勢交錯如犬牙鍊師出世終厭世
一夕飄然乘六氣崆峒西極過崑崙上叩天關謁天帝

帝曰咨汝居太清雲錦為裳素霞珮白玉樓中雪色壁
好畫人間畊織事

送同年齊憲副之山東

城南古道平如掌踏雲駮馬連錢響云是霜臺憲使歸
令我中心殊怏怏金莖千尺出風塵同年如君能幾人
憶昔看花曲江上舉鏹連轡誇青春轉首十年成落落
數人飛步入臺閣大才莫抗君之衡烈烈風聲動山嶽
豈不欲學孟與韓雲龍相逐六合間人生去住理固然
青鬃易點秋霜斑願言忠鯁各相保碧海澄澄日杲杲
借取羽翰登日觀九點蒼烟望中小

畫冊為劉方伯題

老夫觀畫無具眼恐繆千里差毫釐維彼解衣槃礴贏
元君始許真畫師試觀此畫皆名筆儻儻然者乃其匹
一種逼真孫彥古一種抗衡易元吉墨竹造端吳道子
影落夏卿硯池裏東坡老人今復起竹君石丈亦相似
黃筌父子能寫生熙也意匠勞經營翎毛擅塲古崔白
惠崇小景良足稱歷歷千餘年作者非一手此畫信兼
美琳琅雜瑤玖鴈鴒語蝴蝶飛妙意惟有涪翁知十日
水五日石王宰豈肯促迫為無聲之詩有聲畫輞川流
傳滿天下草草題詩奈畫何半簾疎雨看山罷

小畫為鄒以明題

溟濛烟外知何處綠蘿倒挂長松樹謂是鴻山梅李村

道鄉雲孫此中住清溪窅窅少人行白日或聞雞犬聲
安知不有子真筆種玉呼龍谷口耕

竹鷺白頭圖為蘓秋厓賦

寒塘清淺遊魚少雪衣照沙光皎皎鵬程九萬鶴班齊
有時同飛上蓬島忍飢不啄青琅玕此中日日報平安
霜根雪節凜然在白頭晚景好相看

畫松為金尚德郎中題

斷崖削翠一千尺松梢拂破秋雲碧流肪如玉動盈車
赤松子在中郎宅風乎招我陶弘景高卧石林毛髮冷
世人酣夢十八公縱有松風吹不醒

傳神謝袁惟敬

袁生老祖手段好一生傳神不草草四海多識立聲姿
九重曾瞻

天日表生亦不減老祖風筆法妙與心法同都令二者
若存者豈必褒公與鄂公體貌相符何足許宛然神情
與笑語雲裏騎驢客再來屋梁落月人復起五十五年
吾老身渥丹入面回青春多少商巖夢裡人不遇袁生
寫不真

過嚴子陵釣臺

一讀祠堂記仰止五十年今過祠堂下再拜意亦虔他
人若識漢光武必在一朝登宰輔先生獨自着羊裘狂
奴之態還如故凜然高節天寒臨白日照見先生心釣

第一擲先生死客星冥冥烟霧裡坐令四海貪夫廉舍
廉為貪誰个甘彼甘貪者是何物狼吞虎噬餓狗饒仰
瞻遺像若親覲一洗塵心如月白萬鍾九鼎又納賂何
顏來立先生側有手莫折先生祠上樹樹頭有鶴孤棲
處有足莫濯先生祠下水水深千尺清無底嗚呼而夫
之甘貪者鍾乳三千兩胡樹八百斛不如先生釣魚之
餌一粒粟暫爾享富貴終焉遭殺戮曾不如澤中逍遙
一生足安得雲斤月斧伐石鐫我詩賞廉誅貪敢竊春
秋辭祠前再拜放舟去那問先生知不知

黃葵為淮安畢進士玉題

吳興妙手衆所誇而况寫此傾陽花舊題一絕寓深意

讀之令我三歎嗟傾陽花染中央色葉葉龍姿帶青碧
一枝彷彿動薰風千古分明見真墨淮陽進士酷好之
購以百金良不惜不獨愛此花色好願保中心如此赤

贈鄒山人

鄒君鄒君善地理前身應是青烏子翩翩兩袖生春風
炯炯雙瞳湛秋水吾家有地君未相自料平原豈龍耳
吾母原頭為樂立亦不曾見牛眠此祇知土厚松柏深
佳氣如雲鬱然起當時未葬若遇君指示要處何其美
若我駸駸六十年所脩在我命在天清時豈葬江魚腹
馬革裹尸良未然四天無驛任飛步八荒我闔從醉眠
一朝觀化乃常事造物與我相周旋但求狐死正丘首

身後萬事如空烟請相我心如相地皎如明月平如田
君不見青海耿耿鬼亂哭冤魂一往何由復又不見觸
骸狼籍在蓬蒿螻蟻為禽隨所欲我願化身千百億盡
埋枯骨如埋玉眼前便見塚累累若斧若堂若夏屋煩
君借我尋龍經風雨茅齋燈下讀

徐尚賢古畫

吾聞天上五城十二樓又聞金銀宮關海外之瀛洲今
觀此圖非天亦非海千門萬戶平地起連延直至山上
頭一重一掩一結構積蘊累塊不可作想惟雲斤月斧
斫取鄧林木丘山之重回萬牛牛困可奈何人困將焉
尤一朝落成千載計爰居爰處無他憂琪花發時瑤草

秀霧閣深處雲窓幽雕甍重覆鴛鴦瓦翠簾半捲珊瑚
鈎王孫公子三三復兩兩幕天席地爭遨遊黃金爵勒
驟白馬綵絲牽繩移龍舟欲傾東海作杯酒更握北斗
斟河流揚袂風生袖陰澤嬌歌艷舞何時休嗚呼杜少
陵八月風高捲茅屋屋破何以不自愁大廈萬間且為
寒士謀亦有頽垣敗壁臨荒陬屋山夜夜鳴鴉鷓眼中
一或見此突兀不獨不聞大禹卑宮室堯也茅茨土階
不外求執玉帛者來萬國其仁如天覆九州至今寶訓
垂皇猷驪山江都成古丘繁華變滅如一漚此圖聊為
玩物爾請君從儉退前脩山上飛泉往往作風雨但洗
煩熱不洗荒亡羞

鯉魚圖

紅濤翻海金烏浴浮動三千六百軸紛紛水族盡辟易
赤鱗軒騰獨神速龍門萬丈高莫攀奮鬣一躍須臾間
迅雷霹靂訝裂地巨靈負翼驚孽山由來神物為天用
天遣風雷歛相送霖雨明朝沛八荒九重會獻豐年
頌

梅花為鄧以行賦

驪珠洒空亂如電綴向南枝作寒玉玉光照地爛不收
洗盡流塵三萬斛水輪碾破青天痕金波冷浸冰花魂
玉人食花倒綠樽坐覺春意回乾坤白雪為辭珠作唾
罷卻微吟且高卧一聲羌笛五更風滿屋梨雲吹不破

坐窓不邀破硯塵一咲見此南枝春春風藹然吹滿室
花神便覺通詩神少陵老去何曾見巡簷索咲身猶健
留得平生鍊石心相對玉人好顏面西湖骨朽林先生
孤鶴歲晚難為情賴有斯文不墜地清詩首首退咸平
盛舜臣秋亭漫興

勿謂秋亭小九龍山色欄前繞勿謂秋亭孤爽氣滿挹
蓮蓉湖湖山聊云此境界浩興悠然天地外黃花迎節
綻東籬白鴈叫霜來北塞坐對湖山一杯酒酒酣擊劍
蛟龍吼長歌短詠及千篇秋興若為惟八首不登玉粲
樓吾土信美吾何憂不作潘岳賦且樂吾生豁吾度太
玄尚白豈其然光風霽月浩無邊詩餘自汲第二泉呼

取月團亭上煎

索瓦戲作

布衣作官三十年家無儋石囊無錢捲茅風急屋脊穿
劍光夜夜射青天我思昔日張中書家貧無屋船中居
齊帝聞之一大咲世上貧者誰能如我今無船亦無屋
草堂之費長不足晝爾于茅膏索綯典衣買得青松木
經營三年若道旁及有僅比賜之墻燕子不嫌絕低小
繞梁衙得芹泥香但恐八月秋高時捲茅仍被大風吹
吾宗空中碧色瓦價重不減青琉璃願以舟載千萬片
浪花如雪飛湖面鴛鴦愛及屋上烏三間兩間都蓋遍
斗室喚作安樂窩雨脚如麻空自多假令陰陽失燮理

雷電以風奈我何玉川先生屋自破老杜有靈應羨我
苟完苟美而已矣時語時言無不可子華勤三十載
京師始有屋廬在我今幸得歸故鄉門戶不被緇郎壞
雖無定國之高門聊學龐公遺子孫雖無千萬可買隣
吾門通德吾里仁作詩傳語老宗妣况愛亦故溝壑辱
大庇寒士俱歡顏同姓所敦敦薄俗

周惟瞻聽雪

閒閒子閒閒軒軒中默坐隆冬天窮陰久合彤雲連須
更雪花下飄翩紙窓撲簌聲不絕竹間樹裏蕭蕭然聽
之陡覺清兩耳何必洗以水瀆水吁嗟世人不聽雪只
聽繁哇而已矣掃雪自煎雙月團高堂奉母母心喜午

夜殘燈寢未成
雪光如月入窓裏
有時延我平生友
同慶豐年酌春酒
酒酣爭和白戰詩
咲看雪片大如手
翻思朔漠千載前
食雪更啗糲御糧
天南地北骨肉遠
黃沙白草連蒼烟
此時聽雪戎夫共
淚和雪落紅冰凍
豈無報國一寸心
亦有思家千里夢

重瞳天光照覆盆
脫爾戎伍疑寧親
從教平地一文雪
高堂和氣田陽春
陽春之曲非踏莎
請君滿酌金叵羅
胡笳不聞羌管寂
更聽高歌聽雪歌

宜興贈友

錦袍夜着采石月
鶴氅寒披東郭雪
梅軒主者一咲迎
掃雪看花兩清絕
硯池不注西湖波
銅棺壓倒瑪瑙坡

廣平心腸如鍊石
一生無夢落紅羅

春遊圖

遊絲百尺蕩空濶
天上有人落白髮
人生行樂及少年
金縷一聲盃百罰
翩翩兩騎出郭東
桃花如雨吹東風
願倩遊絲絆西日
不教便入咸池中

莫善慶宜遠樓

千家萬家俯南郭
有樓高高參碧落
下視洞庭之岳陽
壓倒武昌之黃鶴
憑闌縱目豁懷抱
坐令納納乾坤小
帶礪山河信不虛
摘星探月天公惱
主人山立口懸河
二十八宿胸中羅
文章煉作五色石
補天力比媧皇多
天公一笑不勝喜
硯池倒瀉銀潢水
水清蘆濕霜兔毫

宜遠詩成泣神鬼閻闔吹來萬里風累蘓積塊眼空
從今百尺不足數下床醉卧陳元龍

林廷器梅月

驟珠洒空如雨粟綴向寒枝作寒玉玉光照地爛不收
洗盡流塵十萬斛水輪碾破青天痕金波冷浸冰花魂
玉人食花倒綠樽坐覺生意回乾坤白雪作詞珠作唾
調高能有幾人和五更羗管空自吹一榻梨雲且酣卧

嘉興留別諸友

春波門外上春船春漲葡萄綠浸天共君細細酌蓬廬
西望落日橫孤烟倚篷橫玉徹三弄飛花誰遣回風送
須臾月出光滿座盃光灑灑金波動美人相逢良不多

美景豈可成蹉跎為歡未久又為別空勞春夢落春波

飛躍圖

魚依于水鳥依木其源深兮其業沃彼魚鳥兮樂自如
子釣不網弋不宿山人習靜畫掩扉鳥飛魚躍誠天機
吾將喚起巖棲子三月東風共浴沂

畫松為鄒顯之賦

彼矯矯兮澗之松清高不受羸秦封天憐受命獨也正
風雨為洗雙髯龍看松有客堅冰節自向松根掃晴雪
縈迴一逕下山去山扃寒泉如井列

咏松壽邵二尹性乃翁

大哉乾坤內萬物皆受命松乎受命獨也正正氣凜凜

不可犯高標落落誰能並棟梁之用良在茲豈是尋常
作談柄兔絲纏綿茯苓老神功可療蒼生病白石既云
爛康干亦或枯時有好事者移之入畫圖花封自有兩
松樹畫圖掩映雲模糊少府哦詩在松下天風颯颯吹
吟鬚迎養而翁於此憇幽處了不聞喧呼歲寒我師魯
一儒不羨秦封五大夫松花釀酒介眉壽青絲屢送白
玉壺與松同歷三千歲虬枝徃徃懸桑弧少府行膺大
夫爵何忝龍門登列岳吉夢先占十八公輕身可跨萬
里鶴南山之橋北山梓翠蓋共拂青雲裡無愧廣平鍊
石心要與梅花作知己

瀛洲春宴圖為過九臯作

弱水萬里誰能度羨爾瀛洲只平步
穀中箇箇是英雄海內何人不歎慕
蓬池贈細宮壺深大斗罰依金谷數
喜氣蒸為島外雲恩波瀉作花間露
玉堂政爾重論思朱紱由來起寒素
區區敬宗何足道一代元勳休易杜

咏蘭

同心之人既不存同心之言亦不聞
我留苔溪餘十日見蘭三沐復三薰
空谷徘徊歲去妥猶喜光風吹不斷
琴操追思魯尼父德馨景仰周公旦
世人紛紛市道交同氣相求惟我曹
夜堂月白蘭雪冷坐擁青氍讀楚騷
遊下遜之武之西園
壬辰冬十月不雨南帆來尋東道主
主為同姓亦同心

序有少長忘爾汝携手一上城南樓下樓迤邐西園遊
西園五畝宅一畝溪聲灑灑後東流臨流洗盞更酌我
一舉累十殊未休山禽啾啾落霜菓竹裡幽花紅一朵
蕭蕭不怕北風吹牽挽各向花前坐君家進士今亞元
讀書三年不窺園泉流不息學海濶請諸子弟窮其源

吳近禮金粟軒

桂樹叢生小軒外主者愛之吾亦愛萬金買斷九秋天
一粒果能藏世界公侯子孫必復始信手月中攀桂子
流光灑灑黃金波浩露溥香入詩髓寄聲玉兔行且遲
吳剛快斧休斫之再長千枝與萬枝人間天上影離離
宋文學文禮新居

芙蓉城外橫官道愛爾年來卜居好門泊東歸萬里船
林宿南飛一枝鳥上堂鼓瑟樂嘉賓滿庭交翠生芳草
飛飛風幕燕銜芹鱗鱗露潭魚在藻由來四海皆兄弟
何啻五家作隣保負郭有田可播種插架多書足探討
兒列三千弟子行母年七十祝難老斯干之時舊秩秩
王者之民今皞皞宅邊更起元龍樓東望滄溟一杯小

寓宜興送翁七兄

長橋如虹卧霜月老蛟千年尚流血三尺長劍青芙蓉
明發解之將贈別別君為作短歌行短歌情長比渭城
春來相約金陵道桃花萬樹迎人笑臙脂坡頭美少年
走避劍鋒跡如掃

浙江李僉憲三峰圖

謫仙豪宕天下無昨日携我遊西湖西湖百頃看不足
頃更袖出三峰圖三峰參差碧雲裡一峰中立擎天柱
媧皇補天此作梯不然那得高如許二老風流有仙骨
雙聳吟肩闢突兀桃花桃實六千年一笑相看如昨日
飽食石髓吸雲液鍊鎖懸崖手攀得鞭鸞笞鳳遊八極
歸來試躡雙玉舄不學具茨七聖迷不學三笑過虎溪
不學潘閔倒騎驢不學山公醉似泥胸中雲夢吞八九
如電之目懸河口致身上界起鴻濛下視華嵩真嵒嶭
峰頭一朵金芙蓉九華旁綴青玲瓏卷還仍挂栢臺上
蕭蕭六月吹霜風

虎為陳汝悅題

矯矯其勇眈眈視巨靈焉得獨喫巖四山一吼腥風生
百獸聞之無處避或寢或訛或負媧馮婦而今不下車
山君之號信不虛彪炳文章七尺軀誰編爾鬚伐爾毛
太公藉爾成大韜隴西李廣誤發矢東海黃公空佩刀
羅詩李筆重千古子建之才誇七步曾從刺史境中來
又向弘農河上渡艾以辟邪屬端午盃以獻功享于魯
於菟乳養楚子文白額除害周將軍市中從來無此物
三人之言所當察寶鼎煉成絳雪丹銅符領出黃金闥
兩人刎頸情如許並坐相歡悟帝語飢蛟力能掉長尾
渴飲慎勿臨江渚

天師龍為羽士王志玄題

轟雷擊碎金陵壁歛火律令縛不得雙飛直到扶桑東
在領明珠照天白天人妙幻出毫末叱退唐僧三藏鉢
天瓢滴罷騎上天遺跡人間識靈物

挽無菴居士王亞卿偉乃翁也

無菴居士落落者 誥曰贈之少司馬恩典由來出至
公名器毫髮不容假昔抱遺經登上舍聲名肯在何蕃
下擢官武選兩遷秩豈為繁劇妨閒雅雅歌投壺祭穎
陽莎柵聯詩孟東野武夫在錄為干城祥金就鑄不躍
冶大將出師嚴賞罰秉筆論功定多寡寒素寧教盡汨
沒貴游誰復相因藉大藩作參益彪炳擊臬祛貪初下

今免租累上流民圖救荒式合周官政亦知萬機賴裨
補何但一方蒙鎮靜退思巖對紫薇花名南人播甘棠
詠西山爽氣逼空翠東序金鍾開浮磬所嗟人生僅百
年胡為舊業荒三徑琴鶴相隨清獻駕圖書滿載長源
乘層層雲嶠興來登歷歷風泉醉中聽無菴菴中一事
無白丁滿地非吾徒紫陽口授參同契瀟溪手畫太極
圖潛心至理入溟濤接踵遐躅輕泥塗崇蘭擢英出澧
浦白雲送雨來蒼梧草書動滿蠶繭紙文彩爛若紅珊
瑚三斗剖開雙叟橘九節種得仙人蒲漆園傲吏夢胡
蝶湘江騷客題鵝鵠會向長沙吊賈誼還從東海尋方
壺都城之東寄窻窻疾風吹花幾寒食鳳毛翩翩下千

何朝陽輝輝呈五色少年已在英雄毅士林爭說文章
伯往者朔方飛虜塵銳我先鋒出奇策胡酋羅拜汾陽
騎元功首勒燕然石間世人才秀所鍾過庭詩禮誰之
力駟馬門閭闢華第雙龍 璽書褒舊德九原良足慰
神靈千載猶堪沐恩澤我心耿耿抱深咎不遇生前呼
小友徒步願執晏子鞭仰止寔切韓公斗壠樹天清白
鶴飛壁梭夜冷蒼龍吼中郎何慚有道碑東坡曾羨談
天口江水猿聲月下船桂香松暖祠前酒大招小招賦
亦成千里萬里魂歸否殘膏賸馥沾可多看雲立馬排
袖久三槐後人天所祐濟濟力牧與風后

宜興沃叟號樵隱

黃鳥嚶嚶鳴谷口懷我平生伐木友夜衾幾度夢丁
尺半鯉魚能寄否買臣富貴不可求斫破白雲千頃秋
行行曲徑下坡去落日青山在檐頭

畫馬

肥馬如龍欲飛去瘦馬亦作衣塵勢兩馬元自胡中來
付與胡人勤秣飼瘦馬曾經百戰場肥馬不識華山陽
瘦者無飢肥亦飽玉山禾如春草長

嚴公素泛萍軒

有舟一葉如浮萍八方泛泛成八溟太乙馮虛啟前道
玄真擊楫隨揚舲世人軒居在平地我軒只在烟波裏
飛雲眇視烏衣國扶桑咸池任游戲天風飄飄着處吹

進兮非速退非遲鴛鴦夢斷鷓鴣飛
雁鳥與我俱忘機
旁人莫笑無根蒂富貴功名一夢耳
何如從我泛洋軒
同逐仙槎上天去

贈許德容

少年赤手能縛虎踏遍東華軟紅土
纏頭百萬輕買笑
挽弓十八漫好武江南風月誰平分
拂衣歸卧龍山雲
姑蘓臺下為別墅招要三友詠五君
金屏如花人去早
北里薰天跡如掃平章不必喚張侯
來往風流成二老

陸元之郎中叢桂堂

六龍城中十萬家連薨接棟何繁華
東園種桃南陌柳
爭似君家多桂花靈根移出廣寒府
葉葉枝枝拂庭戶

祖孫父子盡折之平地不費登天步
初折一枝如碧玉
再折滿掬黃金粟三折四折五六折
散漫天香十萬斛
後來折者良未艾乾坤雖老靈根在
固應笑殺河西人
斤斧徒勞千百載叢桂亭前畫錦堂
郊林只尺探花坊
知已燕山實十郎招隱不識淮南王
中郎舊是同年客
夜來坐我亭中央手援北斗酌桂漿
醉筆為寫叢桂章
吾兒傳經心事違年年看人折桂枝
二郎若也折此子
諸孫手段能如此堂後亦作叢桂亭
同年賦詩大懽喜

湖上宴別圖為吳慶明題

吾觀湖上宴別圖憶昔放舟遊太湖
湖烟湖樹春模糊
一雙赤手鍊網無等閒拾取紅珊瑚
見圖如見中書面

恨不同日相歡呼為君沽酒提玉壺細切金齏繪雪鱸
留者自留別者別南北東西無畏途及觀宴別賦長句
一字價重千驪珠風流典則可歎服落落見此真丈夫
賡歌亦有釣鰲客筆法顛素非吾徒鏗訇金石振天地
一掃秦缶聲嗚嗚最能叙事抱拙叟文錦爛若天葩敷
惜我樂真缺手澤北溪賓賜信義俱老成人去典刑在
撫卷三復朝而晡古來神物自遇合千秋萬歲同須臾
陽春白雪誠寡和遣興聊爾歌吳歎

胡馬圖為姚君旬賦

熊皮作褥着地鋪絳帕抹額老羯胡盤金禿袖青糲糊
辭鷹牽狗皆爾徒彎弓之外一物無有馬赭色明月盧

來朝奔走獻大都悍氣索然成懦夫天南流矢殪厥狐
狼烟永滅天驕殂
房星光熾狼星死胡馬還俾胡人飼白布裹頭胡俗衣
鬚髮蓬蓬亂不理生芻細莖小豆勻銅瓶倒瀉甘泉水
天閑十二足飛龍神駿權奇莫莫比胡馬胡人同慕爾
無乃畜之而已矣

十景為孫郎中廷蘭賦

仙人鑿開井底天旁與山水相鈎連不須更種蘓家橘
一滴入口沉痾痊兒輩學書并欄側井水中有蜿蜒黑
只今飛步上巖廊霖雨蒼生井之澤
有亭翼然山之巔人傑地靈非偶然鳳銜圖後更無事

化作此山千萬年梧桐生孫竹生實天際涼風響琴瑟
鳳兮五色之文章付與亭中舊遊客

芙蓉花開滿清沼人云此是豐年兆天光雲影日徘徊
西湖酒船撐不到千紅萬紫空自多其奈亭亭淨植何
作詩刻在沼邊石如刻漁陽麥秀歌

文昌故事不可求文昌祠立山之頭靈光歸然可彷彿
山石可裂祠不休孫家百尺青雲閣翼然鬣飛兩相若
文光萬丈射斗牛萬古千秋不落莫
生當封侯死廟食鍊峰神靈不可測四時以祀惟馨香
一方之人蒙惠澤迎神有歌歌送神廟前古木如幻身
芙蓉旌旗七星劍雲霧掩映空堂春

鴛鴦偶成鷓鴣羣金沙石礫何足論玉堂學士來作守
灘水一清終不渾三月三日修楔事五馬雙旌駐於此
磨厓文字照琳琅不須真本蘭亭記

玉床平地承丹砂素練白日飄晴霞希夷先生一夢醒
洞口仙桃幾度花花間滴露研朱在人世浮雲空變態
看取留題慎獨銘何必其他求勝槩

有山偃蹇如曲肱龍眠虎伏忘飛騰清流可枕石可漱
噓氣化作玄雲蒸羲皇上人真不死謝安托跡宜於此
山靈夢入洞天深縱有秦鞭鞭不起

天不愛道地不寶黃金裹蹄得多少鳩工伐木金乃費
長虹飛下青雲表為政豈容施小惠乘輿焉得人人濟

從今無復涉溪流南去北來若平地
白沙無泥白如雪沙鳥飛去篆痕沒人家正住沙上頭
朝市喧喧夕市歇酒帘斜逐東風飛賽社人從郭外歸
青雲閣上捲簾看滿地烟花不上衣

卜調元萬竹圖

文洋老守萬古名繼之者誰夏太卿都將胸中琅玕十
萬箇散作半窓風雨聲夢中夜騎籜龍去飛入瀟湘舊
遊處夢驚颯颯雨聲寒又被涼風撼庭樹由來是畫卻
非畫勸君莫向堂中挂分植琅玕滿世間吾家荆玉同
聲價

劉方伯宗善畫冊

昌黎當年作畫記我不作記惟作詩古今人物記所載
今觀此畫能燕之高宗夢帝賚良弼厥象肖者惟胥靡
磻溪坐茅八十叟一出便為王者師瀛洲學士凡十八
豈不朝夕皆論思太白人豪天上謫坐邀明月將金卮
江州司馬心獨苦老淚江水俱淋漓海潮蹴天海神泣
盤渦出沒輕吳兒誰信春遊杜陵老白髮日短憂時危
濂溪胸中包太極開軒坐愛南風吹咸平處士徵不起
踏雪折取梅花枝坡翁泛舟赤壁下二客亦與同襟期
乘興而來興盡返棹破劍曲清漣漪富春山高客屋在
濠梁魚樂蒙莊知仙人樓居倚空碧綵雲瑞靄春遲遲
名花異種一籃裡狂蜂浪蝶成團隨檐頭雖無百朋貨

市童叢集相娛嬉九夷八蠻各通道旅獒底貢將何為
迎貓以爾食田鼠金襪四海豐登時
方今政化平如水大藩民物皆春熙珊瑚木難屑金翠
頌美愧乏瑤琚辭

孔雀圖為宜興沈貞外賦其子時賜

桃花紅酣竹枝綠隔斷金屏艷華屋少陵空賦赤霄行
一生何曾遭抵觸花影滿身紅日高花露滴香露翠毛
明年擬辦五色綉飛上郎君宮錦袍

顏主事山水為俞春官振恭賦

郭熙平遠何處所瀟湘晚景真復古顏郎宋郭同此流
朱粉少年莫輕侮白首為郎車駕部公餘往往拂纈素

蒼烟淡暎夕陽山白鳥低飛秋水渡短篷觀書老誰子
茅屋人家白雲裡我欲敲門借石床醉卧松風呼不起
顏郎今從宋郭游此景此意渺莫求請君珍重十叢收
恐流人間寒具油

題徐應嘉白扇

倒騎玉虬飛上天信手拈下玉嬋娟一揮滿座風泠然
再揮如濯玉井泉池亭月出照白蓮人如蕊珠宮裡仙
皓鶴起舞當吾前

畫龍為劉尚質中書題

躍入延平津裡劍飛去陶家壁上梭時來吸我硯池水
旱天三日為滂沱坐令四海歌年豐成功不居潛乃踪

一靈變化渺莫測世間亦有人中龍

趙惟章蓄松月石泉圖

雙松鬱鬱蟠翠虬孤月皎皎懸清秋千年雲根不可拔
一派寒泉日夜流虬乎似欲上天去石上雲生讀書處
月光照面泉漱耳氣香秋空澄萬慮世人紛紛愛桃李
空花變滅如夢耳何如撫松坐石復飲泉招邀月裡乘
鸞子

歸舟圖為張大叅字中題

天寒野陰秋色暮驟雨顛風當斷渡一舟掀舉銀屋底
江之廣兮不可泝賴爾管前知心腹百文徐牽傍平陸
緬懷曾歷太行險後車必戒前車覆而今舟戒若車戒

自幸急流能勇退退乎退乎進之北事橫萬里前程在
若濟巨川作舟楫戮力殷邦樹勲業有時誕先登于岸
坐看江波平帖帖

送慶壽覺上人

叢林老宿十年別西湖一見萬想滅再聆軟語坐移時
東風吹落梨花雪明發又買江南舟欲向金華覓舊遊
金華不見牧羊客但見白石能點頭休問歸期何日是
到處隨緣且隨喜一瓶一鉢載行李歷歷雲山與烟水

雙鸞吟

有鳥有鳥好羽儀巢我瑣窓瑤樹枝其聲雍雍復歲歲
和我白雪彈朱絲倏然而飛渺何處後者又逐前者去

惆悵斷魂招不來十二紅闌漫延玳珠沉玉碎翡翠寒
菱花青鏡空團團魂隨精衛填東海海水連天何日乾

沈廷美春意軒

三月三日天氣和春意軒中春更多酌罷蘭亭修禊酒
聽我高歌春意歌春滿其人腔子裡八荒我闔廓如許
百花爛熳開春風四澤汪洋沛春雨春陽一脉回九淵
意在庖犧未畫前聖人如天體天德坐令四海無顛連
會登宰輔司燮理伊周事業吾其然廟堂自古起巖野
其人豈是悠悠者有脚陽春復見之美譽芳聲滿天下

沈貞外萬松樓

南遊陽羨里訪我沈夫子夫子好門墻高樓面山起山

中種松一萬株萬松名樓良不虛吾聞古有萬松閣若
此此樓良不如松風徐徐來翠濤滿樓響分明太湖三
萬頃置我樓中之凡上松月皎皎出蒼烟淨無跡誰遣
驪龍頷下珠照我玉容如雪白祝融空自鞭火龍烈燄
不落清陰中敷其雷在南山下螯龍何曾戰于野兒女
花易謝髯叟獨蒼然與樓相好三千年星辰拂開虬枝
摘白雲招入鶴帳眠長材直幹作棟梁夫子 教賜尚
書郎會封十八公有夢占其祥勸君多釀松花酒我欲
登樓共醉崑崙觴

鏡湖

有蟬莫落鏡湖水有手莫折鏡湖樹樹高只容野鶴巢

水清不是濯足處，賀老乞歸來。此地一曲親承天子賜，
金貂換酒醉不起，眼花往往落水底。風流一去三千秋，
而今又見張安丘。安丘勇退在急流，枕流漱石湖東頭。
海鷗忘機日日来，野人爭席漁爭隈。樹頭喚下白鶴舞，
風吹湖水添金盃。

百崖圖為徐惟初題

梅花帶雪皎如玉，竹枝翠映湘水綠。爭飛競噪戀清景，
此地原無復車粟。野田栖栖在蓬蒿，宮殿風微空自高。
何如梅竹就閒曠，世上網羅終不遭。成羣好入王祥幕，
翟公之門亦不惡。棟焚突決奈爾何，慶園而亨喜而躍。
五月五日五色異，三足仍為孝子瑞。徐鄉池館春風多。

請看來集琅玕樹

雲山圖為前人作

大江之南多沃壤，喬木森然似爭長。徐孺名家三百年，
老幹孫枝足培養。虬龍之骨虎豹章，並干雲霄而直上。
嗟彼牛山旦旦伐，此中不聞斧斤響。但聞好鳥鳴嚶嚶，
時有祥鸞來兩兩。青山十里帶平田，流水孤村連宿莽。
考槃在澗隱君子，處世幾曾嬰世網。敲門看竹青藜杖，
載酒尋花木蘭漿。讀騷彈琴太古天，飽挹夕佳與朝爽。
吾將卜隣或左右，東柯西枝數來往。明堂大厦自掄材，
石田茅屋從偃仰。

倪良弼號鈍夫

陰陽為炭天地爐劍師百煉成昆吾天生豪傑即利器
惟哉倪公稱鈍夫切玉如泥一何利寶匣深藏待時至
澄澄秋水芙蓉光鬱鬱碧落虹蜺氣小試虞公指日手
鬼神雨泣蛟龍吼迺知始鈍者終利其不利兮時不偶
鈍乎鈍乎壽所徵為公致詞公試聽人皆喜銳公喜鈍
曾讀子西古硯銘鈍乎若利利天下豈是區區解牛者
上方請劍公其人立斬佞臣如斬馬

山水為陳楚華題

何公以翰墨游戲恠殺旁人說能事元氣混合鴻濛初
不獨區區遠山勢絕壑陰厓老樹橫浪花細草側畔生
天機因應自流動意匠未必勞經營公今飄然乘白雲

見畫如見其丰神元龍鑒賞在此幅其他焉得如其真
邀予披玩堂西廡簾捲東風雪花舞臨風咀雪吐新句
併作清輝照千古

紅梅為徐延齡題

丹霞飛上水玉姿腰暈半醉凝臙脂誰遣西湖明月夜
變作江南春雨時旁人未可輕相視鍊石心腸終不異
結成佳實請嘗試依然金鼎調羹味

成天章草亭

九龍山高峩峩連薨接棟何其多莫道成君草亭小森
然萬象俱包羅君家東南有金匱亭前小金峰可配鑿
地便作滄浪池一勺之中百川匯試問亭中之物今何

如一琴一劍萬卷書琴將脫錦囊雅樂自我正南薰殿
前奉

天聽劍將出寶匣芙蓉光盡納之上方斬奸佞讀書
不萬卷不已亦復致君是理四海蒼生歌泰平伏
鸞高飛卧龍起請看草草春風葉葉恩光好滄
浪一脉通瀛洲小金峯歷蓬萊島

校得敬夫室氏

孤鸞西飛寂無跡一夜塵生金粟尺北堂其奈霜風吹
慈竹萱花落顏色蜀錦如雲濯江水不若斷機分寸縷
珍羞盛以白玉盤不若一粒熊膽丸皇天賜爾賢孫子
慈訓諄諄恒在耳九泉含笑見良人孺人雖死猶不死

夏卿竹為卓太守題

老仙胸中有何物十萬琅玕森玉節等閒吐作清風枝
要與人間洗煩熱琅玕曾伴球琳貢玉節不逐珊瑚折
恠我朱夏非玄冬白日高堂落蒼雪他年
丹山之鳳休啼飢更看一躍化龍去若成大旱作霖雨
嗚呼人生有才用世亦如此顧其所遇何如耳平生一
片歲寒心不媿長身六君子

金臺寔醫士號恒齋

春有常年年來花有常歲歲開人心有常常濟物物我
二者奚擇哉昨日扣門賒藥人今日扣門誰賦頌不須
金一餅錢百緡為我種杏千萬樹滿林藥作紅霞春春

來春去渾不覺。終見花開。又花深滿腔。春意自滿。然來
花食實。皆靈藥。嗟嗟。平夫有常。覆萬物。兮。阜且康。地有
常載萬物。兮。同無疆。人心有常。常濟物。參元化。兮。翊軌
綱。文夫立世。要如此。休論江湖與廟堂。

何小痴聽烏軒

有琴不彈。烏夜啼。有曲不和。烏啼曲。作詩須作聽烏詩。
詩可作。兮。不可讀。讀之他人聞。亦哀。孝子云。胡心不推
烏兮。烏兮。能返哺。人無母兮。良苦。我烏啼庭樹。霜月白
月照寒機。倚空壁。機絲已與腸共斷。霜色還兼淚俱積。
烏兮。烏兮。鳥中之曾參。曷不如參兮。亦不如禽。何君之
孝。若參也。少釋春暉寸草心。

泰山春雲圖為雷方伯作

攜里張道士能作泰山圖。泰山生春雲。為雨無處無。此
圖易作。不易得。得者山東老方伯。披圖豈曰雲乎哉。雲
吾廡兮。雨吾澤。雲兮起日觀。扶桑朝旭相隱見。此時來
盪方伯胸。胸中佳氣鬱葱葱。雲兮靄天門。輪囷蕭索復
氤氳。此時來覆方伯車。隨車按部行。徐徐察民隱。
雨澤一方無遠近。氣葱葱昔從龍。今分廡兮山之東。雲
五色兮表斯世之昌。亦爛若方伯之文章。泰山不動兮
雲自行。時維春和兮。乃發生。方伯將侍
帝左右兮。霖雨下土。何獨視茲青未了兮。在齊魯吾知
夫春雲圖兮。固其所。

漁樵圖為趙惟英題

漁謂樵汝樵勿上山之椒椒有虎兮何其虒樵云虎不在山今在市市人於我無招邀山中暮暮復朝朝負薪行歌兮樂逍遙樵謂漁汝釣弗釣雙鯉魚鯉魚能報平安書漁云平安不待魚書報無榮無辱無毀譽少小持竿八十餘與魚俱樂兮樂何如

二畫為卓太守純嘏賦

洪濤駕空海門濶剛風盪開廣寒關長魚閃目赤若電老兔浴毛白如雪金波散漫不可收玉龍橫戰誰能截安得量如東海心如月旁燭九幽皆洞澈芥蒂不留兮容萬物

海若種松愛松直亭亭千霄一干尺驚波噴薄根不折下踞補天五色石世人可望不可即老絲苓兮爛琥珀海風颯來夜露滴海鶴一聲秋月白

彈琴圖為華守宏作

聖人御極天下平鳳來調律琴乃鳴琴乎琴乎堂上樂八風大播中和聲中和聲淑人心遂令四海皆知音良哉二子廊廟器葆光養素游山林手揮五弦響泠泠目送飛鴻入冥冥世間萬事不可嬰聊鼓琴兮樂吾生琴初鼓兮猗蘭香曲終更請彈文王文王千古有耿光今逢堯舜垂衣裳不作履霜操日和南風歌民無愠兮樂且多民財之阜兮以莫不然頌聲洋洋兮入吾弦吾

發不絕兮大音以傳祝
聖人兮億萬斯年

雙松為華汝器賦

大山五松受秦爵至今濫名不可雪何如雙松清且高
與天為隣伴雲月雲來白鶴與之俱月出兩龍擎寶珠
太和元氣無處無疑作松根白雪腴雪腴且致斯人壽
明堂柱石待時須

榮壽堂為貢御史題

吾家老祖陵陽侯金印斗大不宜留今者解后陵陽客
已鼎願識韓荆州客也臺端老風憲霜作威稜鍊作面
首選我簪緋豸冠崇班立對麒麟殿名門種德三百年

二親強健皆華顛崆峒不老廣成子瑤水長生阿母仙
教子詩書當胸腹機絲自斷還自續眼見澄清最好官
心喜平反不冤獄二年奏寢拜 敕封翟羽豸角衣冠
同北樓文物增勝槩敬亭草木藹春風 君恩曠蕩何
以報自矢一生盡忠孝舊第新開榮壽堂堂下稱觴來
便道吾聞仁則榮又聞仁者壽 帝德好生君體之福
如春雲壽如阜綺疏雕鏤玉玲瓏紅綉刺繡金芙蓉吾
常登堂賀偕老紫毫露滴菡薇濃絕境紅塵飛不到門
外三峰插天峭十里清川一鏡光明年照見金花 誥

贈錢醫士

錢君醫名重九鼎不許尋常定差等舊宅呼為薰奉林

大江變作蘓耽井故人抱病三槐堂扣君之門一葦航
再拜少叙雞壇好千金不吝龍官方贈人以言敷古道
索我作詩何草草見詩如見故人面缺甕城中白雲曉

雲山圖為華守明作

胡公昔年居粉署公餘揮洒發天趣他人能事何足數
此老胸中有佳處白雲溶溶出山裡勢欲載山入海去
須臾雲盡萬境空習習涼風生碧樹西崦人家畫掩門
數聲啼鳥落花村風光絕似舊遊所蠟屐踏破蒼苔痕
公乎翩然乘白雲文采風流今尚存神交千古如一日
何況同時叩帝闈

雙鳳鳴陽圖為金郎中尚德題

皇仁浩浩如天覆奉 敕明刑小司冠南圻罔匪一洗
空采得民風將入奏季方執法烏臺郎老績共載龍江
航餞行冠蓋紛如雨歌咏擬之雙鳳凰鳳兮鳳兮為世
瑞昨昔銜圖獻黃帝萬年枝上集九苞五色雲中呼萬
歲律呂克諧堯大章文采黼黻舜衣裳阿閣突起天中
央亦有千仞之高岡于時飽食琅玕實慈鳥借啄無飢
色群集逐出六合外振鷺飛鴻聯羽翼河東之薛休爭
雄同日拜恩崔侍中蹇予安得五鳳手揮毫作賦追羣
公

鄧法師昆山祁雨

汝南太守十世孫舞雩善禱三吳聞挽將鴻隙陂中水



原件短缺

P54

化作昆山石上雲群呼蜥蜴戲之耳卧龍乘雲歛然起
天瓢倒瀉若懸河我稼勃然田畯喜世人善禱能幾何
鄧君昭格天心多安得如君者作相年年三十六滂沱

畫虎為童內翰大章作

空山落日寒無暉腥風捲地行人稀咆哮一聲震屋谷
百獸莫敢當其威羅公詩與李公筆千古英名同赫赫
只今誰作鄭家群綉爾不成空嘆息

松鼠為堠陽華守振作

樂矣哉松間之鼠無所憂飢食松根之茯苓渴飲澗底
之清流松花洒洒落金粉松風六月涼颼颼既無穿墉
之患又無托社之謀彼在太倉大田者貪廉之性真不

容莫辨連江與絕壑四塞烟霧蒸鴻濛中間摩挲得佳
處老樹骨朽蕪穢盤渦鷺浴白灑瀕列障花綴金芙蓉
居人畊鑿安時論作息去住各不同四時變化自榮瘁
秋氣颯颯春融融金榜懸烏古佛刹玉書附鶴神仙宮
長年採芝者誰子志願未果尋壑峒人間缺網不到此
珊瑚十尺如霞紅我欲覓之惜無路苦搔短髮如霜蓬
安得舜畊置左右虛無一一求其踪會將九節之玉杖
或駕五色之長虹天門夜叉日夜守許我直上騎赤龍
此人此畫得真趣應有金骨雙青瞳我生不仙亦不畫
何以倏忽精靈通作詩要如作畫工九泉喚起浣花翁
老竹為鴻山趙汝明賦

或釣六鰲東海濱或協九奏黃金門或為籩簋薦清廟
盡是此竹之兒孫其餘分植徧天下所用一一難具論
風霜無情冒老節造化有意培深根紛紛桃李易零落
竹祖歸然而獨存清風洒洒滿乾坤

鯉魚圖為庠生王國英題

海門日出金波湧三千六百軸浮動紛紛百恠盡辟易
赤鯉軒騰獨神竦龍門萬丈高莫攀舉頭一躍斯須間
轟轟雷鳴正出地隱隱巨靈方擘山古來神物為天用
天遣風雲歛相送霖雨明朝沛八荒滯毫重作豐年頌
葡萄月圖為劉都督用章題

陰精光射三千丈草龍不捲真珠帳老蟾心煩白兔渴

偷飲人間甘露釀西域歸來凱歌作將軍閒卻青油幕
幕中烟霧晝濛濛水晶無數掛絡索

徐延齡南山書屋

君家積書不積金草堂構在南山深堂前種得書帶草
亦有嘉樹團春陰玉立森森諸子弟朝窮經夕暮閱史
風雷會向山中來硯池龍躍桃花水

屈原圖為過思容題

江水恬恬似鏡平風乎歛來波浪生一時憔悴萬古名
醉者以醒濁者清江魚腹中沒吾寧烏鳶螻蟻何必爭
吾已矣夫漁父行落日滄浪歌濯纓

梅花為前人賦

乾坤一洪爐鍛我心如鍊誰能同此心湖上梅花雪湖水清徹底梅花瘦無比咀雪吐新詩月白山窓裡

畫草為四弟華季題

天涯處處皆芳草王孫不歸佳人老西堂昨夜夢如何湖南萬里情多少金谷園中秋雨深銅駝陌上春風早
祇招黃蝶亂飛來不管蜻蜓都醉倒

洞庭蔡

山南草堂

縹渺之峰與天高居南麓者今詩豪草堂何有有花竹
杜陵野老為吾曹桃花千樹竹無數猶奴千頭供國賦
懽狎時同白鳥閒醉卧不覺青春暮金庭玉柱杳靄間
何如草堂碩且寬賦詩酌酒不減橋中樂吾將與爾卒

歲同盤桓

雲山圖為施用行賦

山重重雲濛濛雲兮作雨致年豐山不動兮萬古同物
物皆由造化功安得直上第一峰瀨氣呼吸與天通都
將心事訴天公洞徹老天明與聰歸來卻掃一畝宮吾
君堯舜臣夔龍十日一雨五日風坐令四海春融融

三醉圖為王朝元作

大江東注葡萄綠一吸頓竭三百斛回風落帽漫不省
醉鄉春暖如陽谷有冠峩然者誰人醉亦非醉全天真
玉山畢竟推不倒平地見此孤嶙峋
待渡圖為同年蕭亞卿元衷題

秋江無波鏡面平中有不測予心驚毒龍吐涎蜃氣腥
一舟往來如葉輕岸上人家住之久碧樹團團遮戶牖
隔江待渡夕陽殘况是天涯重回首

壽王廷貴內翰母夫人

玉堂仙客歸不得遙憶北堂初度日月當十二真五莖
歲在庚辰年七表蟠桃移來東海東梅花雪白桃花紅
寶函金敕不易致雙鳳銜出蓬萊宮九霞盡是黃封
酒殷勤再祝六千壽人孰無子孰無母如此沐徵世稀
有

捕魚圖為馬大尹文麟題

大江吞天碧千頃兩兩三三出漁艇撐篙拔柁掛筌簖

水清照見鬚眉影撒網背著鮫人居得魚勝得珊瑚株
有罾一舉復一舉任公之釣亦不如秦平處處得其所
一生踏浪猶踏土蟻珠暨魚入貢畢足跡何曾到官府
坐觀漁樂樂亦多物無暴殄天時和寄聲今日杜陵老
不須更作捕魚歌

山水為安遠侯柳公題

謫仙曾過金城尉秉燭夜照蓬瀛圖此圖無乃得真跡
赤城霞氣春糝糊桃源窈窕隔幾許雲帆海客知有無
乾坤清氣鎮長在墨汁往往流金壺謫仙天才我豈敢
鑊網冷落紅珊瑚短歌歌罷一回首落日蒼烟漫綠蕪
百子圖為遂安伯陳公題

彩旗懸鈴落官裡化生暖浴銀盆水莫愁錯寫弄璋詩
且詠螽斯好孫子醉時各已脫錦褌三暮出向官街行
玉闌干邊折花劇調弄百種騰懽聲頭玉硤硤髮覆額
瞳珠炯炯黑如漆都稱天上麒麟兒試啼識得真英物
鴛鴦碧瓦翡翠樓銀漢一派通十洲千金尚致垂堂戒
若為縱爾舟而遊嗚呼願得萬方赤子鞠于母箇箇安
樂無疾苦滿堂湯餅客來賀玉果犀錢不知數

壽徐惟正中書

春來十日條風動為我吹開硯池凍拈將綵筆寫新詩
昨夜夢吞五色鳳其詩何謂謂長生長生者誰曰徐卿
二十四考中書令三百六旬一歲成折得梅花和雪嗅

插花起舞為公壽垂垂晚景椿萱榮鬱鬱喬林松柏茂
玉樹芝蘭滿庭下江左風流豈王謝飛騰九萬是前程
連城十五聞高價我從中臺早乞身酌公壽酒凡六春
下榻論文庭頃約借錢買山不計緡憶昔京華承眷眷
曾隨劍履金鑿殿寒淡惟存責沈心踈慵幸遂依劉
願今者盤礴滄江頭開如野鶴并沙鷗仙客藍田勸食
玉老人海屋來添籌天寒贈我錦繡段散米時常助耕
爨從前感德重丘山區區一辭豈容黃酬恩愧乏千黃
金獨有我天知此心為公放罷金籠鷓歌詩再和雙龍
吟

夜遊圖

玉堦平如幸蜀路却灰飛來作花霧他時促迫馬嵬坡
可得從容一回顧二姨相從花陣狂豈解古有英與皇
權聲將變漁陽鼓羶氣暗入薰衣香燭光奪月夜如晝
渴龍捲水添官漏誰道翩翩十六蹄踏轉開元一宇宙
楊都憲升璣諸兄弟同游陽湖

酌我一掬龍泉冷胸中吞盡湖山景吐出新詩醉裡吟
千年痴龍夢一醒楊君清絕湖山主樓船載我遊花嶼
忽發狂言觸龍起白日青天作風雨雨來不見山亦不
見湖水但聞馮夷擊鼓銀屋簷須臾筆掃風雨散湖上
驪珠光燦燦我生抱玉不抱珠楊君莫留戀折將
湖上花掘取峰頭藕人生一世此風流何必金印纍纍

大如斗

庠友徐世重乃翁號愚樂

燕石為大寶太行亦可移此愚人多笑此樂人少知彼
愚之樂猶拙之逸紛紛智巧輩憂勞幾時息不作狂泉
狂只學愚溪愚也魯大賢賢名世莫俱筆駭陋巷樂
不改一貫之傳吾道在我亦西家非東家羨君之樂樂
無涯人生無如愚者樂刻棘屠龍且漫誇

中秋偕吳慶明賞月

有客有客泛舟東湖頭既不泊袁宏之渚亦不登庾亮
之樓月色皎皎當高秋金波倒浸白鳳洲洲兮洲兮謝
眺曾來遊千載之下誰風流吳剛一生愛明月兔魄夜

落雙吟眸自汲洲前水淨洗黃金甌美酒如澆不足惜
但惜清景易過難相留桂子香濃露滴滴蘋花影亂風
颼颼月圓月缺乃常事何勞八萬三千戶虛費玉屑將
他修太湖三萬八千頃和酒一吸入我喉浩歌綠水曲
把玩雙吳鈎廣寒之宮水晶窟盤礴偃仰老即休謫仙
騎鯨去已遠剛乎剛乎與我今同儔

畫竹為姑蘓朱揮使題

梅花道人天下士弄舟濯足湘江水湘江水落硯池裏
幻出脩脩衆君子道人直節君子同一笑六合生清風
無端白日雷雨作籜龍頭角爭摩空縱橫凌亂不可數
倏忽雲開月當午鳳凰噉噉向人吟翡翠翩翩隔岸舞

薄袂不禁蒼雪寒多情贈我雙琅玕道人骨朽名不朽
玉立高標萬古看

琴月為王庭芝賦

浮雲捲盡天如洗明月流光湛秋水山窓永夜寂無人
只有桐君是知己老桂一叢吹古香玉軫濕露水弦涼
坐臨脩竹奏清商聞公宴擊球琳琅人生幾何對明月
安得月圓長不缺月兮琴兮兩清絕好為人間滌煩熱

烏來巢為姚公綬賦

烏乎來巢來何為以爾一家孝與慈昔者三遷教今也
亦斷機養志養體兩不虧烏乎一物耳何心亦何知感
應之理不可欺其來也以速不以遲其巢也以安不以

危不啄琅玕實不戀珊瑚枝門前高柳鳥可依柳葉青
旆旆柳條綠絲絲鳥不來我而來誰不違寧居鳥哺兒
兒亦反哺恐母飢高堂七十且強健眉壽可以登期願
君登進士擢御史卓哉立身天下奇母顏以悅心以怡
鳥乎巢乎宜在茲君不見鳳來巢于梧兮九苞相輝又
不見鶴來巢于松兮千歲為期鳥來巢于柳兮柳亦不
衰鳥乎生誰之多兮或于府中集或于冠上栖子孫孫
子咸如之

嘉興三塔僧號雲間

天間莫如雲人間莫如僧天人一漚不可分雲間合作
僧之名白雲豈是青雲伴上下四方從散漫僧雖在世

能出世外間物物不可絆雲兮雲兮朝隨飛錫千里遊
暮隨破衲宿巖頭野花自落水自流雲油油兮僧休休
傳巖之雲為霖雨泰山之雲觸石起羨爾人明有如此
我欲號作天間子

朱孟陽號曉菴

金雞一鳴天下知跋鳥飛上扶桑枝玉虬噴水吻欲渴
東菴闌檻迎朝曦至人夙興整衿佩萬境昭融與心會
頃爾游神入化初八荒盡在菴之內日華可照霞可食
玉津發源流肺肝尚餘沆瀣三千斛平旦毛髮生清寒
林花冥冥早鶯語芳草池塘夜來雨無端回首海門遙
一抹空烟細如縷

畫竹為張玄靜賦

籀龍變化紛無數苞鳳翮下烟霧瀟湘江上春又深
黃陵廟前日欲暮鼓柁南遊負此心夢中騎鳳呼龍吟
摩挲此畫益珍重琅玕不數千黃金桂觀羽人不稀少
唯君酷愛此君好恍然紫極聽秋聲六月煩襟淨如掃

贈永嘉開元寺僧

浮生百年電一掣三宿開元豈貪佛上人早歲亦儒流
祝髮憑師寄衣鉢青蓮社裏一物無軟語飲我真醍醐
皎然心如大圓鏡洞見萬象開迷途欲借慈航泛東海
願力未能雙髮改東海邊頭有石髓神山一合三千載
吾與上人亦奇遇俗緣未斷留不住明朝浩笑江心去

回首空青兩花處

括蒼葉伯廣號五松

括蒼之山有風門蜿蜒磅礴如崑崙五松出壑其勢尊
下視衆木猶兒孫一松獨得氣之元六丁莫敢撼其根
一松夭矯若騰翥翠濤白日當空翻其餘三松亦長存
舞玄鶴兮啼清猿茯苓更絲深且蕃神功濟世不可言
處士於此構層軒松下白石開窪樽與松歲晚交誼敦
外無雕琢中粹溫身躋壽域荷渥恩彼封大夫何足
論不如五松清氣端乾坤

杜用嘉號鹿冠子

有美其人冰玉姿鶴髮一簪冠鹿皮借問此冠何目製

太古民如野鹿時冠乎冠乎世希有上界叱令六丁守
歲之玉積薰寶香不遇真仙不以授其仙寄跡姑蘓臺
曾度弱水登蓬萊一朝騎鶴上天去親戴此冠頭上四
鷗冠見之避三舍鷄鶴豸風斯下晶熒曾見七星符
瓊竒未數千金價仙山澤癯今代世南行秘書十年
教授白鹿洞紫氣爭候青牛車東坡老人着椰子蓮花
笑殺女道士在園濯濯野吻吻世人那得知其意銅牌
誰記宜春苑坐看蓬萊又清淺我將鹿車披鹿裘願與
鹿冠長作伴

任廷蘭號梅軒

踏雪空山訪姑射不是羅浮夢中客平生亦有廣平心

舉世何人同鍊石任君招我宴東軒軒前雪落花正繁
于時對雪嚼花蕊雪如學舞花無言杜陵詩老骨欲折
我骨不折勁如鍊凜然氣與梅花清中含十二瑤臺雪
知君愛梅心似我枝南開行枝北坐不勞羲畫見先天
漏泄春光第一朶山中獨鶴湖上船翩翩來去如神仙
莫道無言竟落寞迷簷索笑亦忻然

任廷芝號松軒

任公任公 當代之賢豪斬南山之白額釣東海之六
鰲中年無事日遊遨開軒種松子坐看千尺凌雲高
清風落金粉白日宣翠濤四座客常滿酌以松花醪天籟
忽然寂老鶴雲中嗥此境不易及此樂真陶陶流肪一

車許惠我青鏡流年無二毛

張渚張號山溪野人

荆溪一帶如雲漲黃山壁立屋頭上野人今作溪山主
溪月山雲從放浪一生軒冕不累身掃雲掬月溪花春
無榮無辱無箇事誰更逍遙如野人

勸學示兒邦慶邦會

道若大路然讀書分內事不獨韓公訓阿符人人自有
佳子弟五千卷三萬軸包括在胸中一一須過目汝若
不自勤被人笑空腹映雪囊螢猶且讀天寒日短銀燈
續人能弘道道在書道不離身身不辱休學顓孫只干
祿

觀奕圖為過九苞題

伐木丁丁何所求浮生豈入神仙流彼何人斯兩相奕
從而觀之奕未休湏臾斧柯已爛節白日在天猶未落
回首人間不記年恍惚人民與城郭神仙欲求求不得
偶爾相逢若相識自是君身有仙骨世上何人不觀奕
長泚漁隱為薛御史為學乃翁題

雲出泚湖湖上山隱君身與雲俱閒泚湖湖水清徹底
君心之清亦如此客星在天人在地文星直教南斗避
直釣無魚可換酒腹飽六經心自醉釣絲不逐遊絲絕
釣竿不共珊瑚折磻溪非熊且謾說東海六鰲何必掣
高唱滄浪弄明月

贈宜興周生

羽蓋高張庭樹柯明珠倒瀉風翻荷美人當筵唱金縷
周郎一顧意如何長橋斬蛟十世祖波心聽擊馮夷鼓
火雲煽焰渾不知感君坐我水晶府

任廷蘭燕賓堂

燕賓堂在何所任君別墅荆溪潯賓來多如雲樂有東
道主賓主肅肅仍雍雍戶外屢常滿樽中酒不空堂上
日日生春風擊鼓淵淵舞傲傲美人爭送黃金卮玉山
之頽自不覺金谷之罰誰能辭胡不夜遊更秉燭奈此
西飛白日從今人亦有鄭當時邀我為懽懽未足溪上
葡萄浸天綠為君再歌金縷曲

贈劉振之

我住南山下久飲東海名搗來乘風到海岸俯拾瑤草
兼瓊英劉郎乃是人中傑升堂詞翰奴周越眼如巖電
口談天身在江湖心魏闕倒海作盃鯨量寬和氣一掃
霜天寒翠娥停卻小垂手兩兩玉童吹紫鸞英儻不減
石萬石海上高門號通德十五城為白璧酬四千錢作
青桐直日月行天如蟻旋惜陰家學能相傳歲飢發廩
千人活河決鍾土萬指填世人恨無半面識諸葛惟應
管樂匹未須牛角掛漢書自愛末頭看周易考父鼎銘
不記年太阿寶柙蛟龍纏鹿蕉槐蟻捻成夢夔虺風蛇
空自憐老夫出卜幾握粟至竟亡羊似滅穀感君化腐

以為奇朽木從來生腹育

南軒

有偉人兮金玉質生當四海文明日昨朝卜築向明都
坐對南山青翠嶺南薰先送四月涼手握南斗傾天漿
只今吾道亦南矣大鵬九萬同翱翔周南召南自披誦
不作南華胡蝶夢斗南一人更屬誰南州高士聲華重
南帆百里來相尋相許不忝雙南金南陽卧龍幾時起
抱膝且為梁甫吟

畫卷為嚴貳尹正學題

我遊兩京三十年一劍上倚高高天手招雙鶴白雲外
目送孤鴻落日邊鳩來買醉金陵道酒香吹破春城烟

少府緘書至于再邀我醉月池亭前排徊不覺成信宿
看畫百幅書千編畫中風景入桃源又如摩詰住朝川
桃花笑日紅錦簇楊柳舞風青縷牽斷港有船可往復
窮屋無路難黃緣行行抱琴者誰子海山何處尋成連
浮屠百尺出樹杪隱隱時聞鐘鼓傳寒潭深深不可測
老龍抱珠於此眠龍兮何日奮而躍行雨立致大有年
塵海誰能外富貴丹丘自可求神仙一揮醉筆畫卷末
墨花五色增其妍

東丘書舍為外顯之賦

讀書結屋東丘頭旁人莫道東家立立頭種得書帶草
草色交翠芸香浮插架鄰侯三萬軸五經飽貯便便腹

有人載酒問奇字胸吞石渠與天祿老夫甘作西家愚
安得如君能讀書何時搥衣趨館下亦學低頭拜東野

施克莊南樓

十年不作湖海遊白雲黃鶴成悠悠來登百尺之高樓
一笑洗卻萬古愁主人換酒不惜千金裝拔劍起舞白
日飛蒼虬萬家烟樹渺無際一時併入雙吟眸十二闌
干都倚遍醉後亦復相勸酬富貴草頭露功名水上漚
與君且盡今日之懽樂毫髮芥蒂不可胸中留

何太守畫為將朝會題

芙蓉九朵天之表軋坤一點青螺小月斧雲斤琢不成
自是神工奪天巧何羨靈臺與天通墨池暖浸春溶溶

戲拈秃筆一揮洒只尺攤作千萬重銀灣半泓水花淨
千古無人截地鏡何當借我木蘭舟東風載酒尋香逕

林良雙雁圖為王學士廷貴兄廷彥賦

林君善畫天下無海注墨汁傾金壺金門承詔屢揮
洒餘子碌碌非吾徒既不畫丹鳳栖碧梧又不畫文鴛
依綠蒲特作槐堂雙雁圖涼風颯颯吹黃蘆一雁俯豕
秋江燕一雁翹首如相呼乘軒耻隨衛懿鶴化烏懶逐
王喬鳥上林一札寄消息衡陽萬里來瀕史江空野曠
絕繒繳何必屑屑勞其奴吾知林君有深意此圖將以
此兄弟槐堂兄弟今二難同德同心本同氣一以畊莘
樂古人一以探花登學士槐堂終日披此圖以行以序

亦以贄芳名豈但動一時勝事終當傳百世丹青我已
重林君手足誰能似王氏宣王有道美鴻雁周公多才
賦常棣顧予淺薄敢題詩三月紫荆花底醉

卜退之號秋生

浮雲卷盡秋天清秋厓壁立高崢嶸丹梯拔去官無路
鍊鎖倒掛苔花生六龍後人氣蕭爽與厓為隣從偃仰
洞外晴霞素練飄澗窟寒泉玉琴響枯藤亞石驚欲墮
蒼鷹側翅飛不過天開圖畫眩人目一片劍稜橫界破
斯人凜若霜橫秋貞松千尺屋西頭宋織邈矣不可求
其人如玉吾其傳

天台圖

不須方朔三偷桃不須黃眉三伐毛不須解珮漢江皋
不須振衣東海勞自是君身有仙骨豈待金丹傳妙術
半生苦被塵網牽如逐浮萍泛溟渤一朝步入赤霞城
樓居縹緲凌青冥珠簾翠幕半舒卷芙蓉掩映雙娉婷
紫雲風度紅蘭色偶爾相逢若相識胡麻飯熟幾多時
碧香酒醉三千日神工琢出白玉梁曲闌下浸玻璃光
巖溜泠泠仙樂響谷風習習桃花香虫沙回首紛如許
至今誰作烟霞主勝跡長留天地間相尋恨乏雙飛羽

山水為趙惟明題

竹鶴老人天下奇有聲之畫無聲詩餘子碌碌不足數
千古可作龍眠師萬頃滄波天渺渺點破漁舟一葉小

人生行樂須及辰宿攀已斷新知好筆端造化妙奪神
雜花野草江南春春風揚揚何處來遊絲吹隨江之濱
遊絲豈是尋常物天上有人應白髮乃知浮生奈老何
况復天涯感離別陸渾只尺水石間武夷仙翁時往還
萬山深處九仙館謫龍無數歲其間琪花瑤草誰能拾
石髓流香斷厓濕丹梯百尺難黃緣鍊鎖千年土花澁
紫宸班中一回首十年孤負黃花酒歸來看畫更題詩
山靈泣雨寒蛟走清獻雲孫美如玉好事好奇心未足
高堂濛濛起烟霧霧散須臾見紅綠匡廬秀色九江遠
一幅生絹畫不捲太白騎鯨飛上天下視蓬萊幾清淺
詩豪草聖從此窮月光冷落金樽空挽回形勝僅此畫

老夫亦欲巢雲松醉掃長歌歌主客雅量高風誰可匹
一雙白鶴千黃金畫裡青山買不得

述懷効生肖體

槐葉初生如鼠目蝸牛緣樹蔭新綠馮軒高吟坐虎皮
一掃頓令千兎禿墨池之魚曾化龍三尺青蛇在袖中
失馬休嗟塞上翁忘羊岐路迷西東沐猴而冠良足耻
五百關雞同夢死狗監明當薦上林牧猪長揖商立子

葛天僻家譜

葛洪家住定山陽紫氣夜徹牛斗旁或云其地即劍井
或云老仙丹井光竭來示我舊族譜爛然五色之文章
玉堂學士親洒翰蛟龍盤挈鸞鳳翔國朝文章皆李

杜吐酸豈無萬丈長乃知劍井未足信丹井之說猶荒
唐譜間歷歷紀所出水木本源義不忘衣冠繼述僅百
世南北播遷非一方後來循譜者誰子其名清隱仕太
常而今承之曰天驛直欲繼美垂無疆文章可貴金玉
賤子孫孫子宜珎藏嗚呼子孫孫子宜珎藏

山水為葛天寅賦

五色石曾補天一拳墮在山之巔五色絲曾補

袞散作錦樹連錦川何侯平生補天手自瀉金壺墨一
斗須臾雲霧生高堂巨靈擘山霹靂吼我才其如補
袞何歸來咲拂雙盤陀盤陀可坐亦可卧醉攀錦樹成
婆娑山中人家幾時住彷彿桃源舊遊處桃花亂落如

紅雨山人不管春歸去被遲遲者來何許或樵或漁或
行旅仙凡咫尺隔萬里凡夫敢望芙蓉主十年端居學
草玄蕭然四壁囊無錢雕胡未熟蔗漿涸飢餐石髓渴
飲泉也知金印繫肘後轉眼空之復何有文章小技亦
徒為願作至人千古友弱水茫茫不可度回首虛無斷
歸路扁舟載酒且問奇况是人生少良晤何侯懸車更
懸榻葛仙雅意能相合等閒三昧為游戲老我題詩不
敏捷

不二堂為淮安史戶侯孟哲作

連薨萬戶淮南鄉落落見此不二堂史侯阿母失所天
猗被女素當載陽矢心向天不再遣心與白日爭晶光

飛霜一夜萬木落孤松千尺摩穹蒼栢舟之詩可以續
後有史母前共姜西湖湖上春水碧照見頭白孤鶩鶩
此堂之名永不忘乾坤賴爾扶綱常

陳文魁迎碧軒

太湖三萬八千頃未敢凌風放孤艇乘槎亦欲泛天河
詩骨秋高嫌夜冷我溪衍迤繞我軒鏡光十里涵春天
因之名軒以迎碧朝迎碧雲暮碧烟足練平鋪幾曾捲
雪團碎浸玻璃碗翡翠交飛楊柳深鶯鶯雙宿菰蒲短
雨濕荷花晚涼動月照明珠神女美我軒迎碧有如此
何必兩山排闥送

姚公綬席上聞樂有作

雙龍微吟一鼉吼高歌過雲世希有主人風流客亦豪
手掬南溟酌北斗酒籌東折扶桑枝跳丸在樹光陸離
轉教玄夜為白日注海作漏巖遲遲酒沃詩腸不落莫
義膽忠肝露芒角一嘯動氣卷浮雲萬里青天見孤鷗
昨日泊舟鶩鶩湖湖頭兒女爭喧呼焉知今來御史府
寒色凜凜生冰壺黃衫年少城中子平昔何曾到府裏
只應念我倦遊苦故送春聲落雙耳新腔屢換哀絃急
劇歡拔劍向天立咲殺潯陽江上人琵琶一曲青衫濕

秋浦卷為姚公綬甥題

秋浦無風如鏡平秋花鏡裏爭鮮明永寧詩客老梓史
浦上題詩無限情甥也相從千里道歸期及此秋光好

斜日如催落浦帆
暝烟不碍投林鳥
人生浪跡海上萍
北堂白首且歸寧
此歸此樂世應少
前日郎星今客星

楊孟賢號秋林

秋林清秋葉零葉
聲和露滴林影逐
人行掀髯一笑向
空濶世路崎嶇此路平

慈烏羔羊圖為吳以榮題

老烏哺誰誰翼齊
誰烏反哺老烏栖
不比燕燕雖長大
飄然一去東復西
更有巢惡慎勿効
請看慈烏知孝道
王孫金彈打流鶯
不打慈烏念烏孝

羔羊飲母乳必跪
羔乎羔乎亦有禮
羔羊大夫古所美
贄焉執羔良有以
春秋繁露相鼠詩
請君如三復白圭

嗚呼羔羊圖可以配慈烏
人為萬物靈曾謂不如鳥獸乎

送大理丞同年應文明

蓬萊五色春雲起
剪作朝衣拜

天子少微執法漢郎官
直筆紀言周柱史
歛然駘馬之南臺
平明一道風塵開
要使窮民菜色活
先令酷吏狼心摧
勿謂南臺公事緩
東海一婦三年旱
此行端仗子西平
坐見煩冤如霧散
知君胸中飽五經
皎皎霜刃新發劍
馬周何但二十條
別有諫議聞朝廷
金陵俯瞰長江水
艤舟酌水秋風裏
滾滾東流萬古清
君心之清亦如此

送友省親

菖蒲不多花明月豈長滿念我北堂人倚門當歲曉東
華香土多軟紅錢塘江水幾清淺最切三春寸草心焉
知萬壑千山遠風帆快如飛一月到慈闈爛然五色雲
如錦剪作老萊身上衣玉壺滿注碧香酒一摘再摘蟠
桃稀北堂自有三千歲白日不用雕戈揮抱取經綸萬
言策翩然來謁 黃金扉

送王克正進士東顧性之寶之

少年及第美容鏡便得南還拜家慶此樂古今良不多
虎腦挿翼氣何盛鄉里紛紛狐白裘維桑與梓必恭敬
二顏兄弟皆同袍為我寄聲無所贈東南風從天際吹
推我心旌幾時定由來軒冕倘來者萬事不求當俟命
月夜生花飛羽觴安得卞和同此興三槐堂前歌此詩
天籟無聲足清聽

送月舟李叟

騎鯨一去三千年又見後來之謫仙碧天明月照懷抱
夜泊滄江萬里船船頭酌月酒如注金波冷浸桂花樹
船尾酣歌夜若何玉杵聲沉白鸞去盈虧出沒萬古同
人生安得長相從素娥靈藥一朝脫長是娟娟冰雪容

送舉人朱舜文

黃金臺前舞劍歌劍光如雪落酒波歌聲激烈入雲裏
富貴不來將奈何東爾之書且歸去望望白雲渺何處

蛟龍自有雷雨時松柏終為棟梁具曲江江上杏花紅
去年花與今年同君來看花未遲暮我當花下醉春風

贈張指揮

人謂將軍勇我謂將軍孝勇者如君多孝者如君少白
頭祖母年八十將軍心如李令伯朝朝暮暮奉甘旨征
戰歸來解鋒鏑白云少小失怙恃所賴祖母提携力祝
之願得長康健五色龍章自天錫將軍銳氣掃龍沙
披肝瀝膽答

皇家列侯都督有時做倚雲畫戟看排衙

柬錦衣戶侯馮孟仁

紫石玄香試霜兔玉蟾小滴薔薇露題詩欲贈錦衣侯

半日構思知幾度向來小子披雲霧青天如在夢中覩
頃更傾蓋若平生以漆投膠恨遲暮風流之餘存典則
麗澤及人無德色丹崖峭拔不可攀玉海汪洋豈能測
周書孝友尹東郊魯論忠信行蠻貊揚州十萬屬他人
珠履三千非我客前年街

命之金陵六月萬壑生寒冰今年單騎入西晉霜威劍
氣爭風稜成功往往奏
當宁翼翼小心如不勝只今犴獄司聽斷要與法家為
準繩高門駟馬不須說萬釘寶帶皆餘物消埃圖報意
何勤葵藿同傾心更切恠我經年少來往知君當道嫌
干謁神交千里同肺腑對面九疑乃秦越若翁近者駐

行軒朝回戲綵承，惟願欲携梨花酒。一甕共君獻壽歌，南山東園久矣絕。我迹落花滿地苔，痕斑煩君命雀門外候。瘦馬一嘶雙戟間。

西湖春雨為負外劉廷震題

天祿閣中校書客，分得嶺南之澁勃。等閒幻作西湖春，烟雨冥濛翳白日。湖頭人家竹作樓，二月三月涼颼颼。鳳毛輕護牙籤架，羽葆亂拂珊瑚鈎。求羊諸子日容與，相對此君作賓主。洛陽豈無富貴花，一夕紅顏隕如雨。不如此君耐歲寒，殺青可簡籀可冠。何況春來好生意，龍孫突出林之端。坐見凌雲最高節，元非太守胸中物。付之東海任公子，唾手六鰲成一掣。新粉含香暖欲飄。

蒼雪成團寒不消，時時亦有林和靖。引雀携琴度六橋，六橋千樹梅花好。更羨琅玕世之寶，平生豈肯隨委靡。至竟何曾歎枯槁，朝來三肅披此圖。草堂恠底春糲糊，無端思入湘江曲。彷彿耳邊聽鷓鴣。

畫雉為潘漢文題

帝作衣裳十二章，此物昂昂登廟堂。胡為獨宿山之梁，不逐彩鳳鳴朝陽。幸逢祝網開三面，飲啄從容在商甸。不遇能詩謝鷓鴣，後世品流終不見。

翁都帥靜邊亭

有亭翼然甲第東，作之者誰翁元戎。森森兵甲在武庫，落落星斗羅心胸。仰荷朝廷布威德，海不揚波邊不

烽春花秋月兩堪賞騷人野客常相從扶桑挂弓日出
處足躡五綵之長虹能文能武尹吉甫今人古人無不
同堦前種得書帶草色與細柳搖東風有時投壺雅歌
發人謂翁公即祭公有時五絃手自撫青天目送雙飛
鴻雲臺麟閣等閒事桃林歸獸非吾功靈芝甘露好獻
頌回首只尺蓬萊宮作詩饒向亭中石元戎盛美傳無
窮

牧馬圖為

揮使題

胡鷹不飛秋草黃沙磧人稀寒日光將軍手中握金虎
紫髯如戟面如霜天驕年來已深適長城不廢防秋令
金微牧馬晚蕭蕭玉壘揚旌秋凜凜今之武者或少文

將軍文武兼一身論文有道若大路講武妙略如通神
邊軍銳氣壯此行端的資休養寒雲飛盡虜塵空
將星光燄三千丈

進士胡廷慎世德堂

會稽城中世德堂堂前喬木參天長問彼栽培有何術
在德不在人力強仁根深植貫元氣義幹直立當春陽
芝蘭滿堦受其蔭常棣藹藹荆花香梧桐既可伐琴瑟
豫章豈不為棟梁沃以中天之雨露鳴以高岡之鳳凰
世澤無涯由世德以似以續不可忘堂中君子我夙好
手招雲路同翔翔草草題詩不成什敢托金薤垂琳琅
趙郎中鳴盛重慶堂

堂中雀髮白髮白江上好山青復青涇陽趙氏有重慶
江東副將流餘馨春風揚揚吹不散芝蘭玉樹森滿庭
平生何曾積金玉關西清白韋賢經五常之中最良者
手揮三策對大廷只今作官礪名節凜如霜刃初發劍
紫泥 金銜爛五色仰承

恩命來皇尚大鵬昔舉九萬里蟠桃今熟三千齡我欲
乘風拜堂下獻以桃實酌醪醕我家重慶亦如此文軒
安得聯雲軒作詩頌德致深意遙托彩鳳雙飛翎

癯軒為梅郎中彥常乃翁賦

君不見九皋之雀癯而清馭芝飲露三千齡一聲上徹
白玉京寐者以寤醉者醒又不見三湘之竹清且癯前

趨後擁十萬夫潔身不受紅塵污歲寒為友天為徒吳
江江上隱君子山澤之癯清莫比一菴蕭然百事無竹
雀相從而已矣去年天降紫泥書 恩光燁燁生門閭
癯哉癯哉只自如竹間舞雀清酣餘我欲借雀不可得
敢乞琅玕寫秋色癯哉癯哉列仙流蒼顏素髮雙瞳碧

海壇卷為謝主事題

碧梧一葉落中庭遙望海壇山色青東園故鄉先隴在
秋思飛入天冥冥人生皆欲得其所桑梓松楸同此土
奈何中道有變遷少陵老去思韋杜樂庸雲仍曾挈家
只住長樂非天涯東嵐可望不可得幾迴搔首成吁嗟
翰林待詔作圖贈海天空濶浮雲淨孝思不盡目力窮

有淚經天如海迸老成前輩多品題文光白日橫虹霓
省郎往往理家乘寶之不減雙桓圭殷勤為瀉金壺墨
墨花飄飄風瑟瑟若為吟罷重摩挲我亦乾坤長作客

鳳池染翰為中書溫元善作

世無青李來禽帖零落昭陵白玉匣不學公孫渾脫舞
千古神交得心法鳳皇池上春溶溶墨花暖泛龍香濃
錦箋五色淨如拭老兔飽霜鈎畫工金蟾小滴薔薇露
錯落驪珠不知數真行毫髮妙入神借問我朝誰獨
步七閩文物屬晉江溫與右軍真韻韻回首當年學書
處柿葉滿庭秋雨涼

孫廷蘭郎中雲山卷

青青蜀中山山中白雲間連連不斷數千里雲去雲來
若流水南宮故人別我歸我身願作雲相隨明朝回首
停雲處雲兮山兮知不知

胡進士廷慎雙玉卷

春雷未驚九地蟄嶄然雙笋中庭立不因占得元氣先
秀穎發來何太急命之雙玉良不虛而今廊廟登璫璜
璫璜瑚璉信兼美吾當大書不一書

璫林宴圖為吳郎中天錫題

璫林相近蓬萊島紅杏千株春色好甲科多士鵲如雲
盡說亨衢致身早承恩宴罷白日斜東風烏帽吹宮
花紅旗閃影滿歸路白馬翻蹄踏暖沙遭逢酬卻平生

志同向曲江江上醉城中多少痴兒女悔不千金致師幣

山水為陳志明題

芙蓉城南花冥冥元龍宅裏孤草亭拈取夢中五色筆
醉題太守之丹青太守風流冠今代老去高名聞海內
等閒戲墨奪化工一水一石皆可愛此圖真跡更出奇
滿目總是無聲詩詩成石榻掃雲卧夢騎赤龍遊武夷

蔗漿為徐士亨題

剛風捲地崑崙折并刀截斷琅玕節老仙飛入廣寒宮
玉杵玄霜搗成雪雪融蜜汁如天漿太白一咲輕糖霜
步兵醉倒八百斛飲此毛骨生清涼荆門太守徐卿子

不忍文園渴欲死涓涓酌我黃金甌炎火頓灌寒潭水
嗚呼安得此漿浩浩如滄海下以蘇養生無舊亦無害
上以寧

君軀垂衣萬萬載

彭玄中畫為陳志謙題

颼輪一去不可見見畫如見彭仙面底須落月照屋梁
翠壁丹厓色不變行雲有態白英英流水無聲清練練
憶昔牽蘿補茅屋屋頭松花落如霰再續小山招隱辭
歲晏可無猿雀怨

分題織經壽丘太守母

水蠶作繭白如雪親手繰絲絲不絕千絲萬縷上寒機

雙鳳銜梭夜未歇，鳴雞膠膠在風雨。啼鳥啞啞當霜月，織成匹帛衣舅姑。溫暖不知寒栗列，盈箱更製木綿裘。葛章為締更為給，諸侯祿養及千鍾。猶事女紅勤晚節，北堂設悅慶初度。杼軸縱橫窓下列，并刀剪下五色錦。付與諸郎補

衣關

庠友葛大用號支菴

六鰲斷足皆浪語，大塊茫茫有如許。白面書生負豪氣，以手捧天天不墜。只今大厦安如山，手持一木且自閑。胸中六經作經濟，坐令四海淳風還。劍鋒差差白如雪，一擊群魔洒妖血。支菴支菴作天柱，萬古千秋撼不折。

節推孫公

所藏計秋官墨菊

小秋胸中有冰雪，幻出秋花寒冽冽。殷勤贈與尚書孫，移向黃堂見清絕。秋花天賦黃金骨，染卻陳玄池上墨。黃堂執法持三尺，面與此花同鍊色。會須平步上烏臺，霜風捲地花正開。晚節欲分甘谷水，有約尚書宅裏來。判郡吳公祚歲過，廷章溪山圖二首

溪不必遊若耶溪，山不必登天目山。但令胸中別自有，佳處一水一石相對俱。歡顏雲山烟水不可一一到，霜毫寫入半幅生絹間。莫言未了公家事，黃堂退食何其閒。况是曾吞雲夢者，八九下視洞庭十二之雲鬟。憶昔濯足洞庭水，水聲月下清潺潺。袖裏分明有東海酒酣

夢入依池還友于溪花與山鳥豈為新知斷宿攀
我昔夢天倚天表九朵芙蓉望中小而今看畫在人間
螺綠半勻青未了興來欲寫夢天謠百頃平湖作硯沼
少陵詩句宛然見春花冥冥日杲杲人生得意且為歡
莫坐春愁天共老

鴻鵠圖為前人題

鴻乎鴻乎若比翼相逐天南與天北萬里年年送霜信
三湘處處逢秋色脊鴿在原飛且鳴宛宛急難兄弟情
鴻飛鴻止不失序好似人間弟與兄吳侯濟濟六兄弟
同道同心本同氣一圖雙鴻四脊鴿此是良工寫深意
或居鄉國或天涯風雨連床有所思安得如鴻又如鴿

伯氏吹埴仲氏篋嗟嗟尺布與斗粟其人胡不念手足
莫教空對紫荊花此圖此詩宜三復

鷹為前人題

海東萬里如雲飛百鳥不敢誇雄姿若為久立枯樹枝
爾輩正合當軒墀太公儼爾揚牧野未可喚作決雲兒
雲中鵬鷁且勿擊妖狐狡兔一掃之

寄蔣宗儒

六龍城中春如海知有君家杏林在阿兄承恩侍
九重兩鳳連飛端可待東風倚棹甘棠橋橋頭一笑約
明朝刀圭如神君莫吝老去文園多渴病

次韻題顧孟淳所藏古畫

客舟不繫大堤柳搖搖武昌過樊口春波怗怗鏡面平
不似昨日怒濤吼非河之湄非河湄鸚鵡洲前草離離
踏歌無聲遊女散東山山頭月出遲世路來牛與去馬
一生誰是悠悠者欲騎黃雀凌紫虛大鵬何獨風斯下

題永嘉趙司訓諫草堂

白鹿引入甌城遊下馬先到墨池頭墨池主者趙夫子
炯炯文采珊瑚鈎東山不忝謝安石草堂何異杜陵客
山靈自是華蓋君終日相看不相憶我今何幸亦升堂
老懷對君重慨慷蓄薇花上月欲白行酒賦詩殊未央

金蘭

洪壚鎔出黃金汁老兎霜毫輕蘸濕等閒一掃衍波牋

湘水光風來習習蘭玉君家諸子弟古人亦重金蘭契
同心不減骨肉親金弓可斷何其利披圖如見鄭廣文
猗蘭千載留餘薰贈之紉佩永為好人間蕭艾自紛紛

施舟洪芝軒

一別山中采芝客歸到人間頭雪白偶然飛夢落芝軒
眉宇分明見顏色靈芝豈是尋常種交柯接葉金光動
九莖昔產銅池中羞逐琅玕歸禹貢河水樂飢不療飢
療飢直須食我芝商山四老出山去復歸乎來良在茲
春生一室香風起庭下露華凝夜紫永願相從蕭靜之
何必更尋赤松子

聚禽圖為秋官陳公佐作

空烟澹抹琅玕節谷風先隕臙脂雪天雨飄翩六出花
一片韶光闢竒絕兩三羽族良有托時和池館春寒薄
虞羅不來意自樂懶更為巢向阿閣

墨梅為鄒廷儀作

翹空老幹古鍊色千秋雪與蒼苔積世人不識天下白
一夜玄霜染作墨形容雖變貞心存依然寄蹟江南村
老夫試筆寒梢虛併留清氣滿乾坤

寄余司馬士英

泰平無象亦有象濟濟出將復入相獸舞簫韶曰后夔
鷹揚牧野維師尚前者遺塵一掃餘兩度寄我空中書
以身既不生羽翼又不縮地將何如今年有客自京至

謂大司馬余公是西川浩蕩注息波北斗低昂酌元氣
歲乎歲乎不我與願言夙夜酬

當宁雲龍風虎遠相從霖雨舟楫方用汝憶昔贈我青
羔裘玉環價重珊瑚鉤無忘角弓殖嘉樹轉眼又經三
十秋翻雲覆雨誰不然自信所盟金石堅禹稷頽回本
同道江湖廟堂皆一天東閣郎君正年少九萬搏風望
不香明當射策聽臚傳五雲捧日龍樓曉

雲軒為陳德光太守作

太守讀書淮上時滌筆淮水清漣漪一軒藏書五萬卷
天際白雲來護之雲來無心去無迹有時一片頭上黑
須臾飛入硯池中中有蜿蜒人不識往往開軒留我坐

滿地苔花雲點破門生載酒問奇字子雲不厭頻相過
而今五馬入武林雲擁皂蓋黃堂深百萬蒼生正雲望
若歲大旱為膏霖潤物無心體至公成功不居無迹同
老我梨花夢落莫安得相逐如雲龍南遊駐馬西湖路
殷勤更作雲軒賦墨花亂濕彩雲成玉蟾水滴薔薇露
雲軒移在疑香處拄笏看雲度墻去江東日暮亦馳情
惜昔雲中辨烟樹

題陳秋官公佐趙仲穆馬

連錢不動玉蹄健太平百年無野戰未應燕市專千金
從此吳門失匹練玄霜深作雲滂身龍池罷浴桃花春
按圖為爾三歎息世上伯樂今何人

題陳秋官公佐王少耕雞圖

故人舊宅臨挑都天雞一鳴飛織烏天雞只合供天用
世之畜者其雞雖二雖秋秋成老大錦冠鏤距令人愛
既不從賈昌聞亦不受季子介堪伴玄談宋處宗誰敢
縛之向市賣兩兩三三復有雖雖兮啄食時相呼嗚呼
一物之微備五德可以人而不如鳥乎

定襄伯山水二首為公佐陳秋官題

秋光無處不清絕天際孤鴻望中滅小山業桂玉人居
洒洒襟懷湛冰雪浮生有限樂無窮樂與古人心跡同
我亦平生最相好和君長嘯振天風

鵝冰鏤玉天輪巧一樹寒梅着花早林亭虛敞客懷清

滿地苔花雲點破門生載酒問奇字子雲不厭頻相遇
而今五馬入武林雲擁皂蓋黃堂深百萬蒼生正雲望
若歲大旱為商霖潤物無心體至公成功不居無迹同
老我梨花夢落莫安得相逐如雲龍南遊駐馬西湖路
殷勤更作雲軒賦墨花亂濕彩雲成玉蟾水滴薔薇露
雲軒移在疑香處拄笏看雲度牆去江東日暮亦馳情
惜昔雲中辨烟樹

題陳秋官公佐趙仲穆馬

連錢不動玉蹄健太平百年無野戰未應燕市專千金
從此吳門失匹練玄霜染作雲滂身龍池罷浴桃花春
按圖為爾三歎息世上伯樂今何人

題陳秋官公佐玉舜耕群雞圖

故人舊宅臨挑都天雞一鳴飛織烏天雞只合供天用
世之畜者其雞雖二雞秋秋成老大錦冠鏤距令人愛
既不從賈昌閨亦不受季子介堪伴玄談宋慶宗誰敢
縛之向市賣兩兩三三復有雖雖兮啄食時相呼嗚呼
一物之微備五德可以人而不如鳥乎

定襄伯山水二首為公佐陳秋官題

秋光無處不清絕天際孤鴻望中滅小山叢桂玉人居
洒洒襟懷湛冰雪浮生有限樂無窮樂與古人心跡同
我亦平生最相好和君長鬪振天風
鑄冰鑊玉天輸巧一樹寒梅着花早林亭虛敞客懷清

世上紅塵空擾擾在途不是行役者要向水壺邊瀟洒
歸來兩履踏梨雲詩在梅花枝下寫

節孝堂

節婦之節人所欽節婦之孝天寔臨海可枯兮石可爛
萬古昭昭節婦心相舟言節不言孝節孝之詩今獨吟
忠孝堂為錦衣金文英作

黃金積乘高北斗一朝散去復何有不知忠孝存此心
此心傳之乃悠久食君之祿無以報葵藿傾陽耿懷抱
昊天內極歎報難以孝奉親親乃安永嘉金氏忠孝堂
大書堂扁翰墨香勿謂皇天無老眼從前降福何穰穰

鵠原感懷為吳以榮作

以榮先弟縵天折故目鵠原感懷

秋風清秋露零原上鵠鵠飛且鳴胡為乎不忍鵠原行一
行一度百感生鵠乎鵠乎亦有兄弟情形隨影逐不於甥
吾弟胡為乎二豎嬰一夢不醒成退征常棣之詩為誰賦
春草之句空自成連床之被安得如姜肱如手又如足睽
離難合并人皆有兄弟我獨恨不平秋風蕭蕭吹袂反秋
露灑灑作泪傾落日原上孤烟橫更堪獨鴈下寒汀一聲
叫破秋冥冥回首却羨鵠鵠嗟嗟人為萬物靈不如物
兮愧益增悲詞歌兮思轉繁憐君友手如此者鵠原當復
森紫荊嗚呼世間之人皆君之為兄尺布斗粟之謠何由興

釣魚圖

秋風蕭々秋水碧釣得鱖魚如雪白以魚換酒獨酌罷
醉倚蓬窗看秋色灑然襟抱同天隨豈是尋常踏浪兒
平生怕說非熊心鷓鴣與我俱忘機

聚秀樓為莫善禮賦

錫之山為九龍蜿蜒起伏露頭角隱隱鱗甲千萬重又
如九朵青芙蓉秀出平地凌蒼穹錫之溪為梁鴻其流
南北亘西東倒浸天光與雲影一脉直與銀河通溪山
之秀古所鍾攬其秀者今豪雄樓居高高一百尺八牕
洞然纖翳不可容可以納九峯之玲瓏可以延佳氣之
葱蔥下視溪水春溶溶桃花片片逐浪紅秋高月浸波

黎空漁郎唱斷蘆花風登斯樓者文章鉅公舉手摘星
辰吐氣成長虹大約酌我銀河水于以充汪洋之量于
以澆磊砢之胸主人撫掌向天咲便欲倚劍于崆峒目
送萬里之飛鴻元龍湖海士我亦不願從但願再登斯
樓住十日身騎彩鳳奏賦蓬萊宮

鄒以勤號聽泉

少陵詩中十九泉惠山二泉天下傳鄒陽家住恭伯里
清華亭外泉涓涓泉涓涓亦復潺潺然聲如鏘玉如鳴
絃聽之兩耳清如洗置身若在箕山裏聞韶三月不知
味聽泉未必不如此豈獨洗耳還洗心中宵耿耿晝沉
沉不聞孺子哥濯纓不聞漁父來擊音天籟不鳴人籟

寂隱几無言坐虛白文園老去渴病生幸得此中分一
滴區區十九成何益亦不見漪瀾堂中煮茶客

